

摘藻堂四庫全書薈要

史部

欽定四庫全書薈要

史部

御批續資治通鑑綱目卷十五

詳校官編修臣汪鏞



欽定四庫全書蒼要卷七千四百 史部

御批續資治通鑑綱目卷十五

起丙寅宋高宗紹興十六年盡
壬午宋高宗紹興三十二年

凡十七年

六年 金皇統 春正月行籍田禮

是知度州薛弼言州民朽柱中有文曰天下太平
年秦檜大喜乞詔付史館於是脩弼文以飾治具如
鄉飲耕籍之類節節備舉為苟安餘杭之計
自此不復巡幸江上而祥瑞之奏日間矣

發明

甚矣宋之苟安歲月而無必奮之志也蓋曰
吁戒哉敬戒無虞罔失法度罔遊于逸罔淫

于樂任賢勿貳去邪勿疑疑謀勿成百志惟熙罔
違道以干百姓之譽罔喘百姓以從己之欲無怠

無荒四夷來王古之君臣更相戒飭以成治功而未聞同趨於宴安之轍也高宗忘恢復之志秦檜獻逢迎之詞自此苟安之事日作而祥瑞之奏日聞矣吁安有賢明之君忠良之臣而忘親釋怨以行此具文之事哉綱目書行籍田禮文無貶詞乃深貶之爾

夏五月金韓企先卒

企先為金右丞相每欲為官擇人專以培植獎勸後進為己任推轂士類甄別人物一時臺諫多君子號稱賢相

廣義

觀分注所載之實則知敵國之有人矣嗚呼天下治亂係宰相當徽宗之時則有蔡京王

黼欽宗紹亂則有張邦昌高宗南渡則有黃潛善汪伯彥其觀金之企先猶天淵之相絕耳金昌得

不興而宋也
曷得不衰乎

六月金殺其翰林學士宇文虛中

金人重虛中之才號為國師而虛中恃才輕肆好譏
訕凡見女真人輒以礦鹵目之貴人達官積不能平
至是唐古酬等告虛中謀反有司鞠治無狀乃羅織
虛中家圖書為反具虛中曰死自吾分至于圖籍南
來士大夫家家有之翰林直學士高士談圖書尤多
于我家豈亦反邪有司承順風旨并殺士談于是虛
中與老幼百口同日
焚死士談瓊孫也

發明

按分注則虛中無罪為唐古酬等所譖而羅織以害之也故稱國以殺而不去其官以見

金之失政矣蓋虛中叛宋降金乃亂賊耳曷不書誅而書殺彼虛中誠難逃背逆之罪然金誅之為

無名故書殺也雖然虛中叛宋而降金欲保富貴於沒齒今不旋踵而罹禍然則背主降讐者果何哉益

廣義

姦臣降敵而不能逃天網之密者虛中士談是也綱目書此其為叛臣之戒昭矣

秋九月金劉豫死

發明

尹氏曰所貴乎士君子者以其審於出處之際明於去就之義者也武王行大義平殘賊

舉

天下莫或非之由夷叔齊乃獨奮然恥其所為

不食周粟而死若二子者豈好死而惡生哉誠以

君臣天地之大義亘古今而不可泯故寧死而不屈耳自世道埋微士君子不明於大節故有忍恥

蒙垢仕非其地者劉豫在建炎初固嘗出仕於朝後知濟南府當其敵騎縱橫四郊多壘豫用死守

城邑保障山東誠足嘉尚矣洎敵甫退之後豫既不能扞禦不以此時引身而退乃復偷生苟免服為臣僕雖惜立齊國然亦稱臣奉貢而犬馬之矣金以憑陵勁悍之師一旦崛起席捲中原據有宋土士君子稍有人心者必羞見面目安有以拜伏於前為之臣子受其爵食其祿而不知愧恥者哉豫以一身事二姓大節已虧况嘗稱兵犯順卒金寇宋又君子之所深病者固宜直筆深貶之也觀綱目所書金劉豫死則豫之失身於金盡東海之波不足以泄其恥矣士君子之立身至此豈不深可歎哉如漢書莽大夫揚雄死同意

廣義

劉豫者宋臣也綱目何以繫之於金死者庶人之稱也劉豫嘗為齊帝矣何以曰死曰豫

周宋臣繫之金者義絕於宋也以死書者誅其叛逆而庶人之也嗚呼嚴哉

冬十二月金遣使如西遼西遼殺之

先是回紇遣使入貢於金言耶律達實與其國鄰達實已死金遣鈕祜祿罕努與使俱往遼主遇之於野罕努語不遜遼主怒而殺之

廣義

抑考西遼與金亦不共戴天者也殺金之使不亦宜乎

丁卯十七年

金皇統七年

春正月以李若谷參知政事何若簽

書樞密院事○二月李若谷罷三月段拂參知政事○

何若罷夏四月以汪勃簽書樞密院事○金主亶殺其

文武從官十餘人

金主自即位以來委政於尼瑪吟烏布烏珠雖初年
國家多故而吏清政簡百姓樂業既而其後費庠氏
干政朝官往往因之以取宰相金主欲立繼嗣為后
所制心不能平因縱酒自遣酗怒至於手刃侍臣至
是宴便殿醉殺戶部尚書宗禮無何又殺橫海節度
使田叔左司郎中奚毅翰林待制邢具瞻及王植高
鳳廷王倣趙益
興龔夷鑒等

發明

稱國以殺者所以著其擅殺之也傳曰義繫
於殺而見殺之是非有不足紀則正書其官

曹殺其大夫宋殺其大夫是也義繫於人則兼書
其名氏楚殺其大夫得臣陳殺其大夫洩野之類
是也金主制於晨北心不能平縱酒自遣酗怒殺
人此何理耶詩云刑于寡妻至於兄弟以御于家
邦金主不能刑于寡妻安能至于兄弟以
御家邦哉明此然後可得好惡之公矣

廣義

抑觀宣為后所制而反移怒於羣臣果何理哉綱目書此所以著金政之不綱也

五月安置提舉江州太平觀洪皓於英州

秦檜惡皓饒州通判李勤因誣皓作欺世飛語乃責濠州團練副使英州安置

秋八月故相趙鼎卒於吉陽軍

鼎潛居深處門人故吏皆不敢通問惟廣西帥張宗元時饋糲米會降旨趙鼎李光遇赦永不檢舉且令本軍月具存亡申省鼎遣人語其子汾曰秦檜必欲殺我我死汝曹無患不爾禍及一家矣自書墓中石記鄉里及除拜歲月且書銘曰身騎箕尾歸天上氣作山河壯本朝遺言其子乞歸葬遂不食而死天下聞而悲之鼎為相專以固本為先以為本固而後敵可圖讐可復惜其見忌於檜齎志以沒然中興賢相

鼎為
稱首

發明

凡卒故官錄賢也趙鼎當國步危疑之際宏濟難艱獻可替否內足國用外籌軍旅誠中

興之賢相也賊檜譏忌貶竄趙方茲因迫抑齎志以沒豈不深可惜哉時鼎罷相既久而猶書故相者罷之非罪不與其罷也此亦書法之深意

廣義

分注載降旨趙鼎李光遇赦永不檢舉且令本軍月具存亡申省觀此則知當時國命皆

執於姦臣檜賊之手高宗特擁虛器而已悲夫

九月罷四川宣撫副使鄭剛中

剛中治蜀有方畧秦檜忌之使人求其陰事召還責責陽軍安置未幾四川宣撫司亦罷

發明

孔子曰臧文仲其竊位者與知柳下惠之賢而不與立也蓋臧文仲蔽賢聖人罪之何況

忌賢而又扼抑之乎秦檜惡洪皓而安置英州忌剛中而罷黜其職此蓋小人殘忍之心勝耳嗚呼在朝之賢忌而擯棄在野之賢欲其薦引固甚難矣蔽賢之罪小忌賢之罪大檜誠臧文仲之罪人也綱目備書而其義見矣

廣義

分注載剛中治蜀頗有方畧秦檜忌之觀此則知賊檜之心直欲銷宋而後已講和特其

餌耳嗚呼宋何負於檜哉

冬十月朔日食○十二月金及蒙古和

初遼蘭既誅其子勝花都即君率其父故部曲以叛與蒙古通蒙古益彊烏珠討之連年不能克乃與之

議和割西平河以北二十七國寨與之歲遺牛羊米
豆且冊立其長敖拉貝勒為蒙輔國王不受自號大
蒙古國至是始和歲遺甚厚於
是蒙古自稱祖元皇帝改元天興

發明

書金及蒙古和以見欲和者金也蒙古拒金
不屈則見蒙古之浸強金伐蒙古不克則見

女真之漸弱識者可
以觀二國之興亡矣

戊辰
十八年

金皇統
八年

春二月段拂罷

拂聞趙鼎死於海南為之歎息秦檜怒侍御史余堯
弼論拂與小臣私交漏泄政機遂罷為資政殿學士
尋落職興
國軍居住

三月以秦熺知樞密院事

秦檜問勅令所刪定官胡寧曰兒子近除外議如何寧曰以為必不襲蔡京之迹檜怒之寧宏弟也

夏四月朔日食○秦熈罷為觀文殿學士兼侍讀位次右僕射

熈乞避父子共政也尋加少保

發明

秦熈檜之養子不學無術驟登政府此固高宗溺愛不明之失及熈能辭避位次僕射則

是未嘗辭之也故綱目不曰罷秦熈而曰秦熈罷以見黜陟之令聽其在彼高宗亦無如之何也已書之所以著其輕褻名器斥秦熈邪之罪耳吁

五月放浙東副總管李顯忠於台州

顯忠熟知西邊山川險易因上恢復策秦檜惡之降官奉祠台州居住

發明

孟子曰言無實不祥不祥之實蔽賢者當之夫顯忠之放初無所因由上恢復之策見忤

秦檜故耳然則恢復之事為時大諱而不足以言矣吁小人之心毒非蛇蝎而毒於蛇蝎威非狼虎而威於狼虎詎不深可畏哉高宗恭己南面受制姦諛天下之事浸不可為矣書之所以哀之也

六月金以完顏亮平章政事

亮本名都古嚕訥太祖子烏布子為人慄急猜忌殘忍任數自以已與金主同為太祖孫常懷覬望及為中京留守專立威以厭伏小人結猛安蕭裕每與論天下事裕傾險揣知其意因曰留守先太師太祖長子德望如此人心天意宜有所屬誠有志舉大事願竭力以從亮喜遂與謀議及入為右丞進平章務攬

持權柄用其腹心為省臺
要職引裕為兵部侍郎

秋七月寬諸郡雜稅

帝曰人知取之為取而不知予之為取若稍與展免
俟家給人足稅歛自然易辦於是蠲廬光二州上貢
錢米汀漳二州秋稅處州三縣被水民家紬絹鄂州
舊額絹各一年又蠲四川積貸常平錢三十萬緡京
西路請佃田租及
州縣場務稅錢

發明

治國以養民為本養民以寬恤為先自喪亂
以來東南之民疲於供饋水旱繼作弗克存

生帝能惻然懷念特寬雜稅然後民得盡力于農
畝而仰事俯畜之有餘矣誠仁人之量王者之心
也綱目特書乃所以
以不沒其善耳

八月汪勅罷以詹大方簽書樞密院事。○九月詹大方卒。冬十月以余堯弼簽書樞密院事。○金烏珠卒。

金自尼瑪哈死達蘭富勒呼等皆有自為之意。烏布獨立不能如之。何使無烏珠則國勢殆矣。故其國論功以為尼瑪哈後惟烏珠一人耳。

十一月竄胡銓於海南

秦檜諷司諫羅汝楫論銓飾非橫議竄新州同郡王廷珪嘗以詩贈銓坐流辰州新州守張棗承檜旨論銓與客唱酬謗訕怨望詔送海南編管以棗提舉湖北常平至官一日卒時洪皓在英州閩人倪登為守聞棗以巧中遷官取使節欲效之即使人伺隙捕皓家奴寘獄中釀成其罪未及發而登卒事乃解。

十二月金以完顏亮為右丞相

亮生日金主遣近侍局直長大興國以司馬光畫像
玉陶罕底馬賜之后亦附賜禮物金主聞之怒杖與
國而奪回賜物亮本
懷不軌疑畏愈甚

發明

是時亮既蓄篡逆之心茲因奪回賜物逆謀
益決金主不能鑒之於微惜哉故曰臣弑其

君子弑其父非一朝一夕之故其所由來者漸矣
由辨之不早辨也故特書以著其基禍之始云

己十九年

金皇統九年十二月以後廢主亮天德元年

春三月朔日食○夏

五月金出完顏亮於行臺秋九月復召入平章政事

金主以完顏亮為太保領三省事四月壬申夜大風
雨雷電震壞金主寢殿鴟尾有火入寢內炕燔慢金

主趨別殿避之越五日有龍鬬於榆林河水上大風
壞民居官舍瓦木人畜皆飄颺十數里死傷者數百
人五月以天變赦罪命翰林學士張鈞草詔參知政
事蕭肄摘其語以為誹謗金主殺鈞且問誰使為之
右丞相宗賢曰都古嚕訥使之金主不悅故出亮亮
過中京與留守蕭裕定約而去九月至良鄉召還莫
測其故大恐及至復
拜平章謀逆益甚

發明

是時完顏亮逆節既萌金主因天變之異出
之行臺其庶幾矣夫何行至良鄉尋復召用

則是促之使叛耳既懷嫌隙豈宜復用乎易曰亂
之所生也則言語以為階君不密則失臣臣不密
則失身幾事不密則害成是以君子慎密而不出
也金主酷信逆亮疑而復釋則是幾事不密所以
愈益其篡竊之心也是故亂臣賊子要當制之於
微其微不謹其甚難制深可畏綱曰書此此垂戒

矣切

冬十月金主亶殺其弟胙王常勝遂殺其后費摩氏

金宰臣議遷遼陽渤海之民於燕南近侍高壽星等
當遷訴於費摩后后白金主金主怒遂杖平帝政事
秉德右丞唐古辨而殺左司郎中薩哈壽星等竟不
遷秉德辨二人怨望遂與大理卿烏達謀廢立烏達
以告完顏亮亮一日亮與辨語因問曰若舉大事誰可
立者辨曰胙王常勝乎問其次曰鄂王子阿林亮曰
阿林屬疎安得立辨曰公豈有意耶亮曰果不得已
捨我其誰於是旦夕相與密謀護衛將軍特斯疑之
以告費摩后后白金主金主怒召辨謂曰爾與亮謀
何事將如我何杖之亮因此忌常勝阿林惡特斯會
河南兵士孫進作亂自稱皇弟阿梯大王而金主之
弟止有常勝北拉亮乘此搆常勝北拉阿林達蘭特

斯皆殺之金主積怒於后遂亦殺之而召胙王妃薩摩入宮繼之又殺德妃烏庫哩氏及瓜爾佳氏等

發明

孔子曰不逆詐不億不信抑亦先覺者是賢乎完顏亮朶順金鼎原非一日而所忌者常

勝費摩耳茲因亮譖而未能先覺相繼而殺謂之何哉蓋莫親於兄弟而殺其弟莫厚於夫婦而殺其後以親為疎以厚為薄宜乎有以來逆亮之弑也是以國君棄三綱則必有篡奪之禍矣金主之也謂也

十二月金完顏亮弑其主亶而自立

護衛十人長布薩呼圖舊受烏布思圖克坦額呼楚克亮姻家亮皆使為內應大興國嘗以羅卜藏屬亮得為尚書省令史亮度興國被杖怨望使羅卜藏結與國內應興國給事寢殿夜嘗取符鑰歸家十二月

丁巳乘呼圖額呼楚克內直作變夜二鼓興國以符
鑰啓門亮與妹婿圖克坦貞平章政事秉德左丞相
唐古辨大理卿烏達羅卜藏等以刀藏衣下入宮門
者以辨乃國婿亮又至親不疑而納之及殿門衛士
始覺有變亮等抽刀劫之莫敢動遂入寢殿金主嘗
置佩刀於榻是夜興國先取刀投榻下金主求刀不
得額呼楚克先進刀呼圖次之金主頓仆亮前手刀
之血濺滿其面與衣金主既殂秉德等未有厲呼圖
曰始者議立平章今復何疑秉德遂與羣臣奉亮即位
詐以金主欲議立后召大臣因殺曹國王宗敏左
丞相宗賢以秉德為左丞相唐古辨為右丞相烏達
為平章政事誣費摩后為悼平皇后廢亶為東昏王
大赦
改元

發明

金人逞其兵力據有國土其國族自相戕殺
乃亂之本是故金亶殺其文武從官殺其子

殺其弟殺其后與夫完顏亮上弑其主皆詳書於冊所以見君臣大義順之者昌逆之者亡昭然天冠地履之不可紊也前史止載完顏亮弑其君完顏亶至綱目始正名定罪其餘僭竊之誅畧同此類皆所以扶三綱立人極使天下後世亂臣賊子知所懼其垂訓也大矣臣故因而論之

庚午二十年

金天德二年

春正月殿司軍士施全刺秦檜不克

檜殺之

檜趨朝殿前司後軍使臣施全挾刃于道遮檜肩輿刺之不中捕送大理檜親鞫之全對曰舉天下皆欲殺敵人汝猶不肯故我欲殺汝也詔磔於市自是檜每出列五十兵持長槌以自衛

發明

賊檜姦邪人所共憤施全仗義刺檜其志可嘉然冒為不書討而書刺蓋全不勝一朝之

念忘其身以及其親不以討有罪之例與之也然全之死前史皆書誅而此變文書殺者檜固有罪不予其討有罪也綱目徇名責實而予奪之旨公矣

廣義

施全刺秦檜而本朝綱目不書曰盜昔者聶政殺俠累而文公綱目乃書曰盜者何曰施

全聶政不同也俠累秦檜亦異也觀全對檜之辭至今直氣凜然則知其為烈丈夫矣豈聶政之流哉特其勢不在己故不免於刺耳使全得預機務必行誅討何以刺為綱目所以予之而不盜者此也

金主尊其嫡母圖克坦氏母大氏皆為太后

圖克坦后遇下有恩意與大氏相得至歡金主執宣圖克坦氏曰帝雖失道人臣豈可至此金主銜之至

是追尊烏珠為帝廟號德宗二母俱尊為太后圖克坦氏居東宮號永壽宮大氏居西宮號永寧宮圖克坦后生日酒酣大氏起為壽圖克坦后與諸公主宗婦語大氏跪者久之金主怒而出明日召與圖克坦后語者秋之大氏以為不可金主曰今日之事豈能尚如前日耶

三月以余堯弼參知政事丞樞密院事遣堯弼使金

賀即位也及還金主以上皇玉帶附遺於帝其秘書郎張仲軻曰此希世之寶也金主曰江南之地他日當為我有此置之外府耳仲軻由是知金主有南侵之意遂每事先意逢之

下李光子孟堅于大理獄流之峽州責降徽猷閣直學

士胡寅等官有差

光在瓊嘗作私史其仲子孟堅為所親陸升之言之升之訐其事秦檜命兩浙轉運副使曹泳究實泳言孟堅者記父光所作小史語涉譏謗送大理寺獄成詔光遇赦永不檢舉孟堅除名編管峽州于是胡寅程瑀潘良貴宗穎張燾許忻賀允中吳元許八人皆緣生責降有差有從政郎楊煒常州通判沈長卿舊與李光言和我非便知雷州王超求內徙李光俱坐貶又有太常主簿吳元美作夏二子傳指蚊蠅也其鄉人告之以為譏毀大臣且言元美與李光交故其亭號潛光檜大怒竄之容州

發明

甚矣小人之營私也罪人不孥先王大禁賊檜因憤孟堅私史之故羅織擊獄流之峽州

胡寅等緣坐皆為責降夫復何罪嗚呼衛寒莫如重裘止謗莫如自修己有過則彼言當矣己無過

則彼之言妄矣反求諸身益加砥礪奚必憤其私議而疾之深乎綱目之書此詞煩而不殺其義亦可見矣

夏四月置力田科

募民耕兩淮田從知廬州吳達請也

金主亮大殺其宗室

初亮在熙宗世見太宗諸子盛強忌之及即位遂與蕭裕謀殺之又以前左丞相秉德首謀廢立而不即勸進銜之將盡誅焉于是豫教尚書省令史蕭王上慶遂總領三省事阿魯左丞相唐古辨判太宗正寺呼爾察繫鞠至則殺之因遣使如東京殺留守阿林北京殺留守呼拉布南京殺領行臺事秉德并誅其

親屬復殺太宗子孫七十餘人尼瑪哈子孫三十餘人諸宗室五十餘人太宗尼瑪哈後皆絕而烏達肅王等皆受重賞亮又令玉子尚主曰朕無以報卿使朕女為卿男婦代朕事卿

冬十月金主亮殺其左副元帥薩里罕等夷其族

亮復忌舍音諸子盛強及宗室勲舊大臣欲盡除之乃諷都元帥府令史遙設誣飾上變遂殺薩里罕及景祖孫穆里延舍音子博濟及其族百數十人以魏王戚台孫呼爾察好脩飾亦族之

發明

逆亮殘忍之心至是益甚矣既忌太宗諸子盛強而大殺宗室復忌舍音諸子之強盛而

殺薩里罕殺其身而又夷其族自非殘暴酷虐之至者弗克忍為民罔常懷懷於有仁逆亮欲篡位則弑其君惡盛強則赤其族欲為久安長治之計既平內患遂謀併吞厥後世宗甫立身且不保吁

逆亮見忌宗室卒為宗室所圖孰謂果無天道乎
不在顯中在蕭牆之內也故直書以著其惡

秦檜有疾詔執政赴檜第議事

十二月甲子檜始朝命肩輿入
宮門二孫墳堪扶掖升殿不拜

發明

嗚呼高宗誠可謂不知薰蕕之別者矣君薨
百官總已以聽於冢宰三年者嗣君居諒陰

之中故也時宋非居諒陰帝又非有疾病胡為高
枕自肆溺於宴安間因檜疾使臣赴第則是挈全
國之萬機皆決於檜而高宗不可一日無檜者也
高宗忘親釋怨委政姦臣而恣其敗壞豈不深可
歎哉故直書秦檜有疾若至尊然者所以譏高宗
深寵姦回書詔執政赴檜議事所以著高宗挈國
授賊之意

辛未二十一年金天德三年

春正月金置國子監○二月以巫

伋為金國祈請使

伋至金首請迎靖康帝歸國金主曰
不知歸後何處頓放伋唯唯而退

發明

逆亮弑君篡國罪不可赦不可親也女真與
宋世讐不共戴天不可忘也前遣使賀即位

此遣使迎欽宗直書於冊識宋之釋國怨親仇讐
也蓋怨莫重於父母之讐有父母之讐而不知怨
乃欲以屈己請之也則人倫廢
天理滅矣又何有於其國哉

三月金大營宮室於燕

金主稍習經史慕中國朝著之尊密有遷都意遂下
詔求直言而上書者多謂上京僻在一隅不若徙燕

以應天地之中與金主意合乃遣左丞相張浩右丞相張通古等調諸路夫匠築燕京宮室城周九里三步其宮室一依汴京制度運一木之費至二十萬牽一車之力至五百人宮殿之飾徧傳黃金而後間以五采金屑飛空如落雪一殿之費以億萬計成而復毀務極華麗

發明

不曰營而曰大營志土木之盛也無益妄費民不聊生逆亮之不亡其國顧不幸哉故直

書以著其奢
縱之罪焉耳

夏五月金主亮納其叔母阿蘭及宗婦於宮

阿蘭亮叔曹王阿里布妻也亮殺阿里布而納之封為昭妃命圖克坦貞語宰相曰朕嗣續未廣前所誅黨人諸婦多朕中表親宜選納焉宰相乃奏請行之遂納阿嚕子燕爾圖呼嚕子呼喇勒和碩台東德第

嘉哩四人之妻於宮尋封嘉哩妻高氏為脩儀崇義節度使烏達妻唐古昂格舊嘗與亮私及為帝昂格使侍婢來朝亮諷使殺烏達許以為后昂格初不忍亮誅之曰不殺汝夫將族滅汝家昂格大恐縊殺烏達即納之宮中封貴妃大愛幸後與舊家奴姦賜死又使秘書監完顏文出其妻唐古實格而以為麗妃使伊喇補出其妻富察伊徹而納之伊徹亮姊之女也

發明

娶妻不娶同姓者為遠嫌也豈論同源與否哉亮納叔母宗婦名分甚明又非漢劉聰納劉殷二女之比潰倫甚矣肆其兇惡身為篡逆大殺宗室悍然不顧豈復知有叔母宗婦哉書之益以著其罪之難逭耳彞倫紊亂烏可論以人道哉

秋七月除薪米稅○八月太傅鎮南武安寧國節度使

咸平王韓世忠卒

世忠性驍直勇敢忠義事關廟社必流涕極言屢詆和議觸秦檜嗜義輕財錫賚悉分將士持軍嚴重與士卒同甘苦器械規畫精絕過人嘗中毒矢入骨以彊弩括取之十指僅全四不能動刀痕箭瘢如刻畫然知人善獎用成閔解元劉寶等起行伍秉將旄皆其部曲也及解兵罷政卧家凡十年至是卒孝宗朝追封斬王諡忠武子彥直彥質彥古皆以才見用

發明

世忠勲業卓冠一時至於忠精誠確尤為難及宋史書世忠卒而不書其爵李燾長編書

太傳寧國節度使而不書其位號通鑑續編闕而不書史法固無義例也至綱目備載其爵諡位號大書於冊以見褒崇之意君子固當參考觀之然後知書法詳畧皆有深意存其間毋但以作史常

法視之也與唐書

郭子儀卒同意

冬十一月余堯弼罷

壬申二十二年

金天德四年

春三月編管王庶子之奇之荀於

嶺南

初庶卒於貶所其子之奇之荀撫棺而哭曰秦檜秦檜此讐必報親舊皆掩其口曰禍未已也至是為人所告生訪朝廷編管於梅宥州又以直龍圖閣葉三省監都作院王遠嘗通書王庶及趙鼎力詆和議安置三省於筠州遠於高州

發明

王庶為賊檜構陷客死遐荒則其私忿既逞期可已矣又何必逮其子而編管之乎此蓋

小人忌刻之心勝不至於覆人之宗絕人之祀而
不止也嗚呼君子不幸而處昏亂之朝小人橫恣
正道湮沒不惟身不可保抑且子孫受禍哀哉綱
目直書於冊所以深罪當時垂戒後世之意切矣

夏四月巫伋罷以章復簽事樞密院事

伋與秦檜居同里一日檜語伋曰里中有何新事伋
曰有一術士自鄉里來頗能論命檜色變曰是人言
公何日拜相伋惶恐而退中丞章
復聞之即劾伋陰懷異意遂罷

五月襄陽大水

平地五尺漢
水冒城而入

秋九月章復罷冬十月以宋樸簽書樞密院事○十二

月金主亮召濟南尹烏祿妻烏凌阿氏未至自殺

舊主烏祿時為濟南尹烏凌阿氏儀容整肅亮召之乃謂烏祿曰我不行上必殺王我當自勉不以相累也遂召王府臣僕曰為我禱東岳使皇天后土明鑒我心行至良鄉得間自殺

發明

夫婦人倫之大綱君臣天地之大義妻之事夫猶臣之事君妻之事夫則雖夫亡而不再

醮守夫婦之義也臣之事君則雖國亡而不再仕守君臣之義也故曰忠臣不事二君貞女不更二夫烏凌阿氏被召自以為不行則累其夫相從則背其義由是徐至良鄉乘間自殺既不失其身又不累其夫是誠兩全而無害者矣易曰婦人貞吉從一而終也禮曰無別無義禽獸之道也烏凌阿全節死逆亮獨無愧乎蓋逆亮傷敗彝倫滅絕天理又可以人道望之哉據事直書所以予烏凌阿

罪逆
亮也

癸亥
二十三年

金貞元
元年

春三月金遷都於燕

金主自上京至燕京初備法駕下詔改元親選良家
子百三十人充後宮以燕列國之名不當為京師號
遂改燕京為中都大興府汴京為南京削上京之名
止稱會寧府又改中京大定府為北京而東京遼陽
府西京大同府如舊

以王循友知建康府

循友知鎮江上書乞加秦檜九錫檜喜而
遷之踰年檜以循友罪其黨黨安置藤州

夏四月金太后大氏卒

金主遷都於燕親屬皆從留國克坦太后于會寧國
克坦后憂懼每中使至必易衣以俟命太氏在燕常
思念國克坦后病篤以不得見國克坦后為恨將死
謂金主曰汝以我之故不令永壽宮來我死必迎致
之事之當
如事我

五月潼川大水

平地丈五尺
死者甚衆

冬十月宋樸罷以史才簽書樞密院事

甲戌
二十四年

金貞元二年

春正月地震

發明

水與地皆陰質其驗諸政事亦陰象也前書
襄陽大水次書潼川大水此書地震儉邪在

位兵戎竊發之機也是時賊檜當國毒流縉紳逆亮都燕漸謀南寇得非此之應歟宋之君臣畧未見其兢業自脩之實又未見其防姦禦侮之謀災異迭見視為泛常豈不深可惜乎即綱目之所書觀之則當時政治之得失亦可見矣

金右丞相蕭裕謀反坐誅

裕在相位恃功專恣金主倚信之他相仰成而已裕以金主猜忌恐殺禍及遂與蕭豐嘉弩等謀立故遼主豫王延禧之孫事覺伏誅

發明

逆亮篡國以來如殺宗室如殺薩里罕皆書殺而未嘗書誅此書誅者原情定罪也金亮

任蕭裕之專而蕭裕懷廢立之意故既書謀反則必正以坐誅之名亂臣賊子不討將接迹於天下

矣豈因逆亮之故而遽廢討逆之分哉然曷為不
去其官裕為宰相況又得君不能盡心敷治而乃
遽懷逆謀書官正所以
見其罪也厥旨微矣

夏五朔日食○金始置交鈔庫

金以銅少造鈔引一貫二貫三貫四貫五貫十貫五
等謂之大鈔一伯二伯三伯四伯五伯七伯五等謂
之小鈔與諸錢並用七年為限納舊易新諸路
置官庫受之每貫取工墨錢十五文公私便焉

六月史才罷以魏師遜簽書樞密院事○秋七月張俊
卒

俊握兵最早屢立戰功帝於諸將中眷注特
厚然忌劉錡附秦檜殺岳飛為世所鄙薄焉

發明

張俊屢立戰功得君最專豈無官爵之可書乎然忌劉錡附秦檜殺岳飛此固小人之所

為也故卒而削去其官所以深貶之耳

以數文閣待制秦頊修撰實錄院

初知舉魏師遜等議以秦檜子頊為榜首上讀其策覺所用皆檜煔語遂進張孝祥第一而頊第三時檜之子姪姻黨皆擢高第天下切齒至是以頊修撰實錄院祖父孫三世同領史職前此未有也

廣義

分注云祖父孫三世同領史職前此未有者皆言秦檜自知其惡之稔故引子孫任史職

以掩之也噫檜之計亦姦矣其如天下後世何然後知檜之姦乃所以為拙也

八月禁百官避輪對

秦檜擅政以來屏塞人言蔽上耳目一時獻言者非
誦檜功德則訐人語言以中傷者類欲有言者恐觸
忌諱僅論銷金鋪翠乞禁鹿胎冠子之類以塞責而
已故皆避免輪對至是上乃諭執政曰百官輪對正
欲聞所未聞近輪對者多
謁告避免可令檢舉約束

冬十一月魏師遜罷以施鉅參知政事鄭仲熊簽書樞
密院事

自秦檜專國士大夫有名望者悉屏之遠方凡齟齬
委靡之徒一言契合即登政府稍出一語輒斥去之
不異奴隸故自万俟卨罷至此
十年參預政事者纔四人而已

加秦熈少傅封嘉國公○金主亮納其諸從姊妹於宮

壽寧縣主實庫幹里雅布女也靜樂縣主布拉及實
訥烏珠之女也舒庫爾額爾袞之女也混同縣君蘇
魯克沁及其妹伊都阿魯之女也皆亮之從姊妹郎
國夫人重節富勒呼之女孫亮之姪也張定安妻烏
喇古太后大氏之兄嫂也富魯和卓羅喀之妹也皆
有夫亮無所忌耻皆召與之私分屬諸妃位下蘇魯
克沁最得幸每召必親候廊下立久則坐舒庫爾膝
上凡宮人有夫者初猶分番出入後乃盡遣其夫往
會寧不聽出外每幸婦人必奏樂徹幃或妃嬪列坐
輒率意淫亂使諸妃共觀常於卧內遍設地衣裸逐
戲為

發明

亮篡賊也本無足責然據有中王僭號稱尊
故其所為亦不容盡畧是以前書納叔母及
婦次書召烏凌阿氏此書納其諸從姊妹於宮皆
著雜亂之醜行也夫同姓尚不可為況叔母乎宗

婦尚為不可況姊妹乎
據事直書惡自見矣

十二月西遼耶律伊呼死其妹布沙堪權國事

子幼故也布沙堪自號承
天皇太后諡伊呼曰仁宗

乙亥二十五年

金貞元三年

夏四月施鉅罷○五月朔日食

六月鄭仲熊罷以湯思退簽書樞密院事○改岳州為
純州岳陽軍為華陽軍

或言岳州乃岳飛駐軍之地又與其同姓乞改之蓋
以媚秦檜也岳州人謂飛駐軍乃鄂州於我州何與
而改之

廣義

嗚呼小人中傷善類不至於聲銷影沉不止也且岳飛武穆既薨其子瑑皆歿足可以遂

檜之奸矣今也姓同州名果何害哉先正文公謂
小人之心私而刻彼賊檜殆有甚焉者也然則君
子之不幸而遇此則將若之何哉蓋度其勢可除
則乘時亟行誅討否則奉身退避如韓世忠者不
亦善乎

金汴京火

金主陰有南侵之意乃謀遷汴遣完顏長寧為南京
留守經畫之既而大火宮室盡焚金主大怒杖殺長
寧

發明

是時金將南侵謀遷於汴既而大火宮室盡
焚則天厭其德不能久享國祚之意可見矣

孰謂天道無知而可以忽之哉綱目不書事應而事應已在其中然後知人心天命不可誣耳噫

秋八月下趙鼎子汾等於大理獄

秦檜於一德格天閣書趙鼎李光胡銓三人姓名必欲殺之及鼎死而憾不已江西運判張常先箋注前帥張宗元與張浚詩言於朝其詞連逮者數十家將誣於不軌而盡去之會汪召錫告宗室知泉州令矜觀檜家廟記口誦君子之澤五世而斬謫居汀州檜乃諷殿中侍御史徐嘉論趙汾與令矜飲別厚贐必有姦謀詔送汾令矜大理鞠問使汾自誣與張浚李光胡寅胡銓等五十三人謀大逆獄成而檜病不能矣

發明

賊檜殘忍之心至是愈烈矣前書下李光子孟堅于大理獄次書編管王庶子於嶺南此

書下趙鼎子汾等於大理獄則是獄犴頗置延及無辜李光王庶趙鼎既卒而猶憾之不已禍及子孫其罪可勝誅哉若檜者存一日則貽害一日姑賢之心老而彌篤矣一書再書深罪之也

以董德元參知政事

秦檜

門人

冬十月徙洪皓於袁州未至卒

皓居英州九年始復朝奉卽徙袁州至尚雄卒卒後一日秦檜死皓久在北庭為金人所敬既歸金人至必問皓為何官居何地不幸為檜所忌不死於敵國而死於讒惡間者悼之

廣義

皓在金國抱印符卧起十五年金人啗以美官畧不動心身雖在金心不忘宋常以大誓

未復為恥其視子卿之節無愧焉噫子卿歸漢而功輝麟閣洪皓歸宋而寃死遼方其與子卿不同有如此者君子為之長太息也

進封秦檜為建康郡王加其子熺少師並致仕是夕檜死

檜病帝幸其第問焉無一語惟流涕而已熺奏請代居相位者為誰帝曰此事卿不當與帝還宮命沈虛中草檜及熺制並令致仕熺夜遣頃與右司員外郎林一飛宗正丞鄭枬見其黨殿中待御史徐嘉右正言張扶謀請已為相檜卒遣表有云願陛下固隣國之權盟謹國是之孫動贈申王諡忠獻檜居相位十九年倡和誤國忘讐數倫包藏禍心刼制君父陰和結內侍及醫師王繼先伺上微旨動靜必具知之邵國

事惟申省無至上前者性陰險深阻如崖窅不可測
同列論事上前未嘗力辨但以一二語傾擠之俾帝
自怒一時忠良臣將誅鋤畧盡其頑鈍無恥者率為
檜用爭以誣陷善類為功凡無罪可狀者則曰立黨
沽名曰訕謗曰指斥甚則曰有無君心章疏皆檮自
操以授言官識之者曰此老秦筆也晚年殘忍尤甚
屢興大獄察事之卒布滿京城稍議之者即捕治中
以深文如知饒州洪興祖作程瑤論語解序引不使
大臣怨乎不以即以為讖已毀其板編管祖興於昭
州京西運副魏安行嘗為鏤梓亦編管於欽州其羅
議人類此執政惟取備員甫入輒出惟深德王次翁
歷四年始出之立久任之說士淹滯失職有十年不
解者然附之則立與擢用開門受賂富敵於國外國
珍寶死猶及門檜每事與帝爭勝曹筠言水漲詔遂
之檜陞為從官周葵欲言梁汝嘉檜不待帝言即改
除之由是張扶請檜乘金根車呂愿中獻秦城王氣詩

其勢漸不可制。檜既死，帝謂楊存忠曰：「朕今日始免防檜逆謀矣。」朱熹曰：「紹興之初，賢才並用，紀綱復張，諸將屢以捷告，恢復之勢蓋千八九金人。於是始露和議以阻吾計，而宰相秦檜歸自金庭，獨以長樂梓官藉口，攘却衆謀，熒惑主聽，使和議翕然以定，而不可破。士大夫狃于積衰之俗，見國家無事，而檜與其徒皆享成功，無後患，顧以忘讐忍辱為事理之當然，嗚呼！始則唱邪謀以誤國中，則挾敵勢以要君使人，偷不明人心不正，而未流之弊遺君後，親無所不至。此檜之罪，所以通於天，萬死不足以贖也。」

發明

史稱賊檜包藏禍心，脇制君父，戕殺忠良，主和誤國，雖擢髮不足以數其罪，也是故雖殞

於病，惻然不免直書其死者，忘親釋怨，檜實尸之。且又為之相也，噫！劉豫叛君，則書曰「死秦檜誤國」；則書曰「死皆所以討亂臣誅賊子之特筆也」；然則惡惡之情見矣。命義之戒嚴矣，士君子擇善之致。

昭 矣

廣義

或曰秦檜在金金人未嘗加以殊恩異禮反從而臣之及其歸也高宗賜以恩禮之隆是

德金而欲忘宋之若是耶否則將以議和饗富貴也曰非也抑嘗考夫檜賊之類末矣彼以靖康二年二月金人執張叔夜及秦檜以去是年五月叔夜自殺於金軍秦檜偷生不死其在金也亦無忠義之事見書則其無君之心益不待主和議而後見也原其所志不過欲為張邦昌劉豫耳蓋金人以邦昌之愚立為楚帝劉豫厚賂達蘭又得為帝於齊二人之逆罪有所不容誅矣當夫金人以和議餌宋檜則首倡之故達蘭陰縱其還使主和議以忘宋斯時也達蘭必以立豫者以許檜焉故檜堅執其議而衆言不能奪也厥後達蘭雖誅檜猶妄想前圖所以力阻恢復之謀殺害忠良而不顧

馬曰邦昌以僭逆受誅劉豫以武穆見廢二人之事皆檜目擊者也檜尚欲為是邪知而欲為則謂之愚非姦也曰姦人者富貴利達迷其心觀其用計則姦究其實境則愚然則姦者正所以為愚也善乎東萊之論莊公曰始吾以莊公為至險終則以莊公為至拙檜之謂然且夫檜之心非不知邦昌劉豫之禍也其心以為邦昌劉豫無能為者也使我堅主和議而誅宋以亡之則金人必德我而與之以國南北惟我與金而已金雖強倘我智力能禦亦未必如汴宋之亡不然甘為石晉可也曰何以知其然耶曰當檜縱還之初嘗言如欲天下無事須是南自南北自北耳況乎歷觀綱目所書或諸將復一州得一捷檜必嫉之甚則至欲盡淮為界以畀金間有言金人之情者必為之忌諱況於殺武穆之後檜則各遣諸將還鎮縱金人以取土地一日對高宗言事金之禮當如高麗之事本

朝則檜之微意蓋可見矣幸而天福宋膺絕其後嗣不得一遂其姦而死桓溫曰不能遺芳百世亦當遺臭萬年其賊檜之謂乎綱目書曰是夕檜死者蓋深憾其幸免於刑戮也

金主亮迎其太后圖克坦氏至燕

亮命以大房山雲峯寺為山陵遣右丞相布薩思恭等如會寧奉遷太祖太宗梓宮迎圖克坦后至流沙河亮親迎之命左右持杖二束跪太后前曰亮不孝久缺溫清願答之后掖之曰今庶民有克家子尚且愛之不忍答我有子如是忍答乎叱杖者退既至居壽康宮亮事之外極恭順后起則自扶之常從輿輦徒行后所御物或自執之見之者以為至孝雖太后亦信其誠

廣義

分注載亮事其后之禮得不感動於人耶逆亮狡詐如此雖親母尚信其誠況高宗乎

黜秦檜姻黨十一月釋趙汾及李孟堅王之奇等自便

臺諫湯鵬舉等畧疏言秦檜之姦請逐其親黨詔安
置戶部侍郎曹泳於親州罷端明殿學士鄭仲熊等
四人徙侍御史徐嘉正言張扶為他官知建康府王
會等六人並以諂附貪冒罷又竄呂愿中等于遠州
秦頊秦焞秦焞等俱以檜黨濫科革正之莫及張常
先等八人並以告訐濫叨官爵送遠郡編管尋釋趙
汾奪二官與李孟堅
王之奇等皆令自便

廣義

觀於此則知高宗治檜黨於檜死之後者非
不知檜之姦也特受其制而不敢為耳即易

所謂輿說輻夫妻
反目者也哀哉

以魏良臣參知政事○十二月復張浚胡寅張九成等

二十九人官徙李光胡銓於近州

光移郴州銓移
衡州光尋卒

發明

自賊檜檜陷善類延及無辜君子之受害亦
多矣今而釋趙汾等自便復張浚等官徙李

光等于近是皆革故鼎新收人
心之大機也故備書以予之

丙子二十六年

金正隆
元年

春正月追復趙鼎鄭剛中等官

二月魏良臣罷○三月罷宰相兼樞密使

以邊事

已定也

以万俟卨叅知政事○竄東平進士梁勛于遠州

勛上書言金人必舉兵宜為之備帝怒編管勛于千里外州軍而下詔曰講和之策斷自朕志秦檜但能贊朕而已豈以存亡而渝定議耶近者無知之輩鼓倡浮言以惑衆聽至有偽撰詔命召用舊臣抗章公車妄議邊事朕甚駭之自今有此當重寘典憲

發明

設險守國固王公之當然思患預防亦君子之宜然高宗恐恥事讐偷安苟且謂和議可

以固守謂江南可以久居而祖宗之中原父母之深恨一切付之以不問但見賀正旦賀生辰賀即位稱臣奉貢恬然無恥殊不知金亮之目中久無江南矣梁勛度金必內侵上書設備是亦思患預防者貶斥于外謂之何哉此高宗所以卒老江南而無必為之志也綱目直書以著其拒諫之失

廣義

觀分注高宗之詔辭于以見高宗以和議定于中秦檜以和議倡于外高宗得秦檜以濟

其欲秦檜得高宗以逞其姦故曰二人同心其利斷金向來恢復諸諫詎能入哉高宗庸懦無識于是詔蓋可見矣

夏五月以沈該万俟卨為左右僕射並同平章事湯思退知樞密院事

初秦檜病篤召董德元湯思進至卧内屬以後事各贈黃金千兩德元慮檜以為自外不敢辭思退慮檜以為其期死不敢受帝聞思退不受以為非檜黨遂信任之

六月以程克俊參知政事○靖康帝卒於金

發明

魯昭公薨于乾侯胡傳曰諸侯失國出奔衆矣鄭伯突為祭仲所逐入于櫟而復國衛侯

衍為孫寤所逐入于夷儀而復國昭公在外八年終以客死為天下笑故春秋詳錄其所因以為後世戒欽宗受父之托不能死守社稷復為臣虜三十餘年以善而終豈非幸歟然必書靖康帝者不予金之封中國也其不曰崩者已失天下故貶而絕之也為人君者觀綱目所書卒于金之義知社稷之無常奉也亦必少警矣
嗚呼可謂深切而著明矣

命史館重修日曆

以秦熈修
不實也

秋七月彗出井詔求直言○八月程克俊罷以張綱參知政事

綱初為給事中，以秦檜用事，遂致仕。卧家者二十餘年。嘗書座右曰：「以直行，已以正立朝，以靜退高天下。」其篤守如此。

九月，以陳誠之同知樞密院事。○冬十月，復安置觀文殿大學士張浚于永州。

浚去國二十年，天下士無賢不肖，莫不傾心慕焉。武夫健將，言浚者必咨嗟嘆息。至兒童婦女，亦知有張都督。金使至，必問浚安在，惟恐其復用。而秦檜懼其正論害已，令臺臣有所彈劾，語必及浚，謂為國賊。必欲殺之。檜死，乃復觀文殿大學士。判洪州時，喪母，將歸塋，會星變，求直言。浚慮敵數年間勢必求釁用兵，而吾方溺於宴安，謂敵可信，莫為之備。沈該、万俟卨居相位，尤不厭天下望，自以大臣義同休戚，不敢以

居喪為嫌乃上疏極言沈該万俟卨渴思退謂敵未有釁而俊乃若禍在年歲間者皆笑其狂臺諫渴鵬舉凌哲等論浚名在罪籍唱異議以動國是若使歸蜀恐或遠方生患復安置永州

發明

君子之事君義而已矣不以用舍而貳其心不以存亡而易其節苟為合義死生以之初

不計其身家之利害也茲因彗出詔求直言浚乃條陳時事力詆姦臣見忤沈該之黨而乃復貶永州吁既求直言反拒言者則是以天變為玩戲之物而無警懼之心審矣直書于冊不再貶而其義

自見

廣義

分注載張浚自以大臣義同休戚不敢自隱其賢而必以其道者其忠誠可謂至矣然檜

雖死而浚猶懼竄逐亦高宗懼聞恢復之一念也嗚呼浚遇高宗其不幸孰甚焉

丁丑二十七年

金正隆二年

春二月以湯鵬舉參知政事○三

月万俟卨卒

高為相主和固位無異秦檜士論薄之

發明

高宗宰相書卒者僅數人李綱趙鼎書爵万俟卨不書爵高不人道也何以言之夫宰相

變理陰陽斡旋造化股肱元首德撫四夷固當公平正大而無一毫偏僻之失斯為宜也高私憾岳飛以傾之誤國主和君臣俱辱高宗苟能按罪行辟則高豈容但己況其相業無聞如惡張浚言事之類此皆小人所為故綱目于其卒也削去其官以示貶耳若不別其賢否而槩書之何以為予奪之權衡哉

夏六月以湯思退為尚書右僕射同平章事

發明

死万俟卨而相湯思退則是魯衛之政兄弟也又安足以贊襄治道黼黻皇猷哉高宗之

命相僅如此則其弗克有為亦可知矣書之乃所以譏之也

秋八月以湯鵬舉知樞密院事○九月張綱罷以陳康伯參知政事○冬十一月湯鵬舉免

戊寅

二十八年

金正隆三年

春二月以陳誠之知樞密院事王

綸同知院事○三月朔日食○秋七月金以李通參知政事

初金主亮召其倖臣祕書少監張仲軻左諫議大夫馬欽校書郎田與信等便殿侍坐金主謂仲軻曰漢之封疆不過七八千里今我國幅員萬里可謂大矣仲軻曰本朝疆土雖大而天下有四主若能一之乃為大矣金主曰彼且何罪而伐之仲軻曰臣聞宋人買馬脩器械招納山東叛亡豈得謂無罪金主喜曰向者梁琬嘗為朕言宋有劉貴妃者資質美艷今一舉而兩得之俗所謂因行掉臂也江南聞我舉兵必遠竄耳欽與信皆對曰海島蠻越臣等皆知道路彼將安往金主曰然則天與我也朕舉兵滅宋遠不過二三年然後討平高麗夏國一統之後論功遠秩分賞將士彼必忘勞矣時金主恃其累世強盛欲大肆征伐以一天下嘗曰天下一家可以為正統及拜李通參知政事通揣知金主意遂與仲軻欽及近習羣小輩盛言江南富庶子女玉帛之多逢其意金主以通為謀主遂議興兵南侵

九月以王剛中為四川制置使

初剛中言敵國之情強則犯邊弱則請盟今勿計其強弱而先擇將帥蒐士卒實邊儲備軍械加戍數年國勢富強彼請盟則為漢文帝犯邊則為唐太宗上壯其言會西蜀謀帥帝曰無如王剛中矣遂有是命

冬十月金營汴宮

金主亮遣其左丞相張浩參政敬嗣暉如汴京營建宮室國子司業黃中使還上言金人治汴京必欲徙居以迫我不可不早為之備若彼果至汴則壯士健馬不數日可及境矣湯思退大怒左遷中官

發明

書營宮議妄費也逆亮將謀併宋已非一日向自會寧而還燕今自燕京而都汴南侵之

兆已萌矣而湯思退之徒方恃和好辭言用兵豈不深可歎哉下書籍諸路兵造戰具所以著其實

也

己卯二十九年

金正隆四年

春二月金籍諸路兵造戰具

金主亮謀南侵乃造戰船於通州遣使籍諸路明安部族及契丹奚人不限丁數悉僉之凡二十四萬又僉中都南都中原渤海丁壯年二十以上五十以下者皆籍之凡二十七萬雖親老丁多求一子留侍亦不聽又遣使分詣諸道總管府督造兵器命諸路舊貯軍器並致於燕時又建汴宮脩燕城民不能堪箭翎一尺至千錢村落間往往椎牛以供筋革至于烏鵲狗彘之物亦無不被其害者

發明

兵乃防姦之資戰乃禦侮之畧是故黷武非春秋所貴息兵為君子所嘉逆亮籍衆兵造

戰具初非防姦穴又非禦暴客不過欲逞一時之私而懷吞併之心焉耳中國不競而為外邦所侮

不能北向而一決徒恃和議諱言戰功豈不深可惜乎哉綱目之特書所以惡金而哀宋也

夏五月貶禮部侍郎孫道夫知綿州

道夫使金還金主亮謂之曰歸白爾帝事我上國多有不誠今畧舉二事爾民有逃入我境者邊吏皆即發還我民有叛入爾境者有司索之往往托詞不發一也爾於沿邊盜買鞍馬備戰陣二也蓋欲南侵故先設此二事為辭道夫還具奏之帝曰朝廷待之甚厚彼以何名為兵端道夫曰彼身弑其君而奪之位興兵豈問有名湯思退沈該不以為然道夫每對帝時輒言及武事該疑其將引用張浚忌之故得貶

發明 明者能決幾微於未然智者能料禍患于將然故曰人無遠慮必有近憂是時金營汴宮而南侵之勢已成籍兵造器而南侵之機已肇況道夫使金逆亮親諭高宗何故溺愛仇敵而畧不

加意乎逆亮篡弒姦淫骨肉三綱絕而五倫廢安肯顧兩國之好而不背盟者哉道夫直言而被貶則非其罪為可知矣書以譏之宜也

廣義

大抵高宗南渡不過偷安而已當其被金南逐常懷北顧之憂而以大讐未復為恥可也

故凡敵情之真偽敵勢之強弱敵國之治亂與其君臣之輯睦悖戾等事豈可一日而忘之耶今也道夫之歸金雖無一言以及邊事尚當詢其所以何如耳況以其指瑕造釁為言而奏哉今者既得其跡而乃恬不為慮決非中興之主也臣故曰高宗南渡不過偷安而已

六月遣王綸使金

帝聞金主亮有南侵意疑之使王綸往覘綸還入對言鄰國恭順和好無他皆陛下威德所致湯思退等

皆賀帝曰中外之論皆欲沿邊屯戍軍馬移易將帥為進取之計萬一輕舉兵連禍結何時而已

陳誠之罷去沈該免秋七月以賀允中參知政事○八月召監潭州南嶽廟朱熹不至

熹徽州婺源人少有求道之志父松知饒州疾亟屬熹曰胡憲劉勉之劉子翬三人學有淵源吾所敬畏吾即死汝往事之熹奉以告而稟學焉既博求之經傳復徧交當世有識之士及舉進士為泉州同安主簿罷歸問延平李侗學于羅從彥得伊洛之正遂步往從之其學大要窮理致知反躬踐實而以居敬為主築室武夷山中四方進學之士從之者如市上聞其賢故名之熹卒不至憲安國從子生而靜慈不妄笑語紹興中與勉之同入太學時禁伊洛之學憲與勉之求得程頤之書潛抄默誦夜以繼日聞涪陵譙

定受易學於願二人往從受業父未有得定曰心為
物漬故不有見惟學乃可明耳憲悟曰所為學者為
克己工夫耶自是一意下學不求人知一旦揖諸生
歸崇安故山力田膏藥以奉其親從遊日衆號藉溪
先生仕終秘書省正字朱熹嘗言從憲及勉之子輩
三君子進而事籍溪先生為父得其學為多勉之從
熹定劉安世楊時受學卒業乃還崇安結草堂讀書
其中力耕自給淡然無求于世惟與憲子輩日相往
來講論學者踵至勉之隨其才器為說聖賢之道因
以女妻熹門人疏曰白水先生子輩始從子以父死
國難痛憤致疾棄興化通判隱居武夷山中者十七
年與憲勉之交相得每見講學外無雜言他所與遊
皆知名士而期以任重致遠者朱熹而已熹初從子
輩遊子輩以易之不逮復三言俾佩之終身學者稱
為屏山
先生

發明

不至何嘉其志也朱子師事李侗契其要領二程之道獨得其宗高宗既聞其賢即命召之朱子抱道自樂卒辭不至可謂甘性分于鼎餗視勢分於浮雲而漠然無有動于中者也君子人與君子人也回視頗有一技一能而曉曉自鳴以為仕宦之捷徑者詎可同日語哉故夫書召以予高宗之求賢書不至以予朱子之樂道此皆綱目之特筆也

九月以湯思退陳康伯為尚書左右僕射並同平章事

帝謂康伯曰卿靜重明敏一語不妄發真宰相也今與思退共政如有可否勿憚商確康伯曰大臣論國事自當盡心若依阿植黨臣所不敢

皇太后韋氏崩

帝事后甚謹先意承志惟恐不及或一食少減輒不勝憂懼常戒宮人曰太后年已高惟優游無事起居適意即壽考康寧事有所關慎勿令知第來白朕至是崩年八十矣諡曰顯仁

冬十一月攢顯仁皇后○十二月以王綸知樞密院事

庚辰三十年金正隆五年春正月以葉義問同知樞密院事

二月以普安郡王瑗為皇子更名瑋進封建王

初帝知瑗之賢欲立為嗣恐太后意所不欲遲回久之及皇后崩帝問吏部尚書張燾以方今大計對曰儲嗣者國之本也天下大計無踰於此今兩邸名分宜早定帝喜曰朕懷此久矣聞春當議典禮燾頓首謝至是利州提點刑獄范如圭投至和嘉祐間名臣奏章凡三十六篇合為一書囊封以獻請斷以至公

勿疑帝感悟即日下詔以普安郡王為皇子加恩
平郡王璩開府儀同三司判太宗正寺稱皇姪

發明

高宗伏義建立賢王通者椒寢未繁冊為宗
社之本可謂始終不負公天下之心也太宗

視此烏能及哉綱目特
書於冊所以深美之耳

夏六月王綸罷秋七月以葉義問知樞密院事朱倬參

知政事

倬初以張浚薦自宜興簿入對時方以劉豫為憂倬
策其必敗帝大喜而秦檜惡之出為越州教授檜死
倬知惠州陞解因言前事帝問卿因何久淹如此倬
言為檜所扼帝愀然慰諭目送之且曰人不知卿惟
朕獨知遂累擢至中丞論
事多所裨益帝信任之

八月朔日食○賀允中致仕○九月以李實為浙西副總管

實嘗陷金拔身自海道來歸至是召對詢以北事歷歷如數乃授官令于平江督海舟捍禦

冬十二月湯思退有罪免

侍御史陳俊卿論思退挾巧詐之心濟傾邪之術觀其所為多效秦檜蓋思退致身皆秦檜父子思也宜寘之憲典遂奉祠

發明

不曰免而曰有罪免貶絕之詞也思退姦邪之小人是乃秦檜之道黨欺君誤國做効成

風豈宜宰正百官乎茲因臺臣之劾即免思退之官則庶幾可以洩人神之憤矣

廣義

或曰秦檜主和議誠有覲觀之心而其心又非思退之所知者思退復踵其姦何如曰秦

檜固有覲觀之心思退踵之者不過欲如檜之富貴耳小人之喻於利何嘗知有君父耶俊卿論免思退其為高宗之幸豈淺淺哉綱目之書有罪者誅其姦於未死時也

初行會子

戶部侍郎錢端禮被旨造會子儲見錢於城內外流轉其合發官錢並許兌會子輸左藏庫初行於兩浙遂通行

諸州

辛巳三十一年

金正隆六年十月
世宗雍正大定元年

春正月朔日食帝不受

朝○風雷大雨雪

侍御史汪澈言春秋魯隱公時大雨震雷繼以雨雪孔子以八月之間再有大變謹而書之今一夕之間二異交至陰盛也今臣下無姦萌戚屬無乖刺而又無女謁之私意者殆為兵象乎願陛下飭大臣常謹于備邊也

發明

正旦日食大變也蓋日者衆陽之宗人君之表當正旦而食其異甚矣風為陰氣雷者陽

氣之發雨雪者陰氣之凝時當正月雷未可以出而風雷此陽失節也雷已出則雪不當復降而大雨雪此陰氣縱也陰陽運動有常而無忒凡失其道人為感之也今陽失節而陰氣縱兵連禍結之機兆矣綱目災異必書雖不言其事應而事應具存惟明於天人相感之際響應之理則見君子所書之意矣

二月分經義詩賦為兩科以取士

禮部侍郎金安節言熙寧元豐以來經義詩賦廢興離合隨時更革近合科以來通經者苦賦體雕刻習賦者病經旨淵微心有弗精業難兼濟後進往往得志而老生宿儒多困也請復立兩科永為成憲從之

三月以楊椿參知政事○以陳康伯朱倬為尚書左右僕射並同平章事○以吳拱知襄陽府

先是陳康伯以金人必敗盟請早為之備及聞金人決欲敗盟乃召楊存中及三衙帥至都堂議舉兵又詔侍從臺諫集議康伯傳上旨曰今日更不論和與守直問戰當如何時上意雅欲視師內侍省都知張去為陰沮用兵且陳退避策中外妄傳幸聞蜀人情洶洶朱倬無一語康伯奏曰金敵敗盟天人共憤今

日之事有進無退聖意堅決則將士之意自倍願分
三衙禁旅助襄漢待其先發應之乃以利州西路都
統制吳拱知襄陽部兵
三千戌之拱玠之子也

夏五月金主亮使人來求漢淮之地始聞靖康王之喪

金主亮嘗密隱畫工於奉使中俾寫臨安湖山以歸
為屏而圖已之像策馬於吳山絕頂題詩其上有立
馬吳山一第峯之句至是遣其簽書樞密院事高景
山右司員外郎王全來賀天申節亮謂全曰汝見宋
主即面數其焚南京宮室沿邊買馬招致叛亡之罪
當令大臣來此朕將親詰之且索漢淮之地如不從
則厲聲詆責之彼必不敢害汝蓋欲激怒以為南侵
之名也又謂景山曰同日以全所言奏聞全至臨安
一如金主之言以詆帝帝謂全曰聞公北方名家何
乃如是全復曰趙桓今已死矣帝始聞淵聖崩遽起

發哀而罷詔持斬衰三年上淵聖廟號曰欽宗

發明

始聞者因金使來而得聞喪罪慢也蓋欽宗亦嘗君臨天下況為高宗之兄不幸容死金

庭是乃宋之大恥且人生莫重于人倫人倫莫先于父兄今而上皇欽宗相繼殂落高宗僅能求還上皇太后邢氏之喪而付欽宗于不問夫復何說父母之讐不共戴天兄弟之讐不與同國高宗匿怨而事仇金豈不悞哉故直書始聞以深警之

廣義

宋累使至金何其卑屈也金遣使至宋何其倨傲也國步陵夷其可數乎汪澈論天變之

應至是驗矣

以吳玠為四川宣撫使○六月以劉錡為江淮浙西制

置使屯揚州

時宿將無在者乃以錡為江淮
新西制置使節制逐路軍馬

故遼人伊喇幹罕叛金圍臨潢

初金主亮徵兵南侵使牌印素赫如西北路盡僉契
丹丁壯契丹人曰西北路接近鄰國世世征伐相與
讐怨若男丁盡從軍彼以兵來則盡係累矣幸使者
入朝言之素赫畏罪不敢言遂與牌印耶律娜等盡
起男丁於是西北路招討司譯史薩巴與部衆殺招
討使完顏烏色及素赫等而執耶律娜取討招使司
貯甲三千遂反議立故遼主延禧子孫衆推都監老
和尚為招討使山後山前諸羣牧皆應之咸平府穆
昆瓜里舉兵據咸平繕完器甲出府庫財物募兵以
應薩巴其勢益張金主亮使布薩呼圖等討之皆無

功而薩巴自度大軍必相繼而至勢不可支謀歸於西遼乃率衆沿龍駒河西出薩巴既行而舊居山前者皆不欲往偽署六院節度使伊喇幹罕殺薩巴執老和尚等自為都元帥擁衆東遷至臨潢府東南新羅寨東京留守曹國公烏祿使伊喇扎巴招之幹罕已約降已而復謂扎巴曰若降爾能保我輩無事乎扎巴見幹罕兵衆強盛車帳滿野意其可以有成反說之曰我之始來以汝輩不能有為今觀兵勢強盛如此汝等欲如羣羊為人所驅去乎將欲待天時乎若果有大志吾亦不復還矣其黨有前伯特本部族節度綽哈者言昔右紳丞相賢能人也嘗說西北部族他日當有事今日正合此語恐不可降也于是幹罕決意不降遂攻臨潢而圍之其衆至五萬

發明

凡書故將予義也遼金世仇而能倡義伐金謀立故主皆綱目之所予者曷為以叛書誅

心也考之分注起兵者譯史薩巴及老和尚等而猶有謀立故主之心幹罕不能助之起義而乃殺薩巴執老和尚以奪其軍況又約降烏祿則是其心非純乎遼者故不以起義予之而變文直書曰叛所以著其不赦之罪焉耳
綱目誅心之法其旨嚴哉

廣義

伊喇幹罕叛無非因民之不忍也亮也何不自返而欲南侵耶

金主亮遷都于汴

發明

書曰遷汴者民非欲遷為金主之所遷也傳曰懷土常物之大情遷國重事也雖違害就

利去危即安猶或恐沉溺於衆不肯率從而況迫於橫逆非其所欲棄久安之田里以新徙之蓬蒿道途之勤營築之勞豈不惻然有隱乎肆行而莫顧不仁甚矣凡書遷不再貶而其惡自見矣

秋七月金大括馬于諸路

先是調馬於諸路以戶口為產計五六十萬匹仍令戶自養以俟至是又大括羸馬官至七品聽留一匹等而上之并舊籍民馬其在東者給西軍在西者給東軍交相往來晝夜絡繹不絕死者狼籍于道其亡失多者官吏懼罪或自殺所過蹂踐民田調發牽馬夫役詔河南州縣所貯糧米以備大軍不得他用羸馬所至當給芻粟而無可給有司以為請金主亮曰北方比歲民間儲畜尚多今禾稼滿野羸馬可就牧田中借令再歲不獲亦何傷乎于是國內騷然盜賊蜂起大者連城邑小者保山澤有以盜賊事聞者亮輒杖而黜其官太醫使祈宰上疏諫南侵亮殺之由是羣臣不敢言

金主亮大殺宋遼宗室之在其國者

凡百三十餘人

發明

嗚呼逆亮殘暴之心至是極矣宋遼宗室久陷邊陲歷相既加寬貸之恩逆亮乃懷殺戮

之慘使元元帝胄靡有孑遺哀哉雖然逆亮戮君篡國彘倫掃地莫親於己之宗室而尚加屠毒況疎之者耶宋遼宗室服為臣虜殆欲偷安於一時不料禍出於目下譬猶身履虎尾其不為彼所啣者幾希矣故直書

大殺以著其暴

廣義

自古鄰於強敵者未有能善其後者也蓋鄰之幸我之不幸也人能保敵人之不肆吞陷

哉此聖人之所以拳拳焉屢一民尺土之防者蓋懼後世罹禍之慘也君子觀劉石金亮之恣謀戮則知有天下者慎固封守不可以不之講也

周麟之有罪免

初麟之受命賀遷都憚不欲行陳康伯以國事相勉之麟之語侵康伯曰使其不為宰相當自行若大臣者與國存亡雖死安避麟之竟辭行至是坐免

遣樞密都承旨徐嘉如金至盱眙金人卻之乃還

嘉至盱眙金主亮使韓汝嘉就境上止之曰朕始至此比聞北方小警欲復歸中都無庸來賀也嘉乃還

發明

為國者莫大乎別天冠地履之分正名分綱常之道共主而屈於藩位則是天冠地履之

倒置矣忘讐而交強鄰則是名分綱常之逆施矣若高宗釋父母之讐結強鄰之好誠萬世之恥也夫何既知逆亮以渝盟復遣使臣以往賀何其愚之若是耶迨至盱眙為金所卻嗚呼宋使於金則

事之為甚恭金卻宗使則似待之為甚倨不自立而為外邦所侮詎不深可醜哉高宗舉措如此誠不可以論自強之道矣
詳書於冊深識之也

八月宿遷人魏勝起兵復海州詔以勝知州事

勝多智勇應募為弓箭手居山陽及金人籍諸路民為兵勝躍曰此其時也聚義士三百北渡淮取漣水軍宣布朝廷德意不殺一人金知海州事高文富遣兵捕勝勝迎擊走之追至城下文富閉門固守勝令城外多張旗幟舉烟火為疑兵又使人向諸城門諭以金人棄信背盟無名興兵及本朝寬大之意城中人聞即開門獨文富與其子安仁率牙兵拒之勝救安仁及州兵千餘擒文富民皆安堵如故勝遣人諭胸山懷仁沐陽東海諸縣皆定之乃蠲租稅釋罪囚發倉庾犒戰士分忠義士為五軍紀律明肅部分如

宿將勝益募忠義以圖收復遠近聞之響應旬日得兵數千勝將董成率所部千餘人直入沂州殺金守將及軍士三千人衆悉降得器甲數萬金遣蒙古鎮國以兵萬餘取海州抵州北二十里新橋勝帥兵出迎之設伏於隘障以待衆殊死戰伏發敵大敗殺鎮國馘千人降三百人軍聲益振山東之民咸欲來附勝傳檄招諭結集以待王師之至沂民壁蒼山者數十萬金人聞之入不下若首勝晷告急於勝勝提兵往救之設陣於山下金人多伏兵勝兵遇伏皆赴砦金人棄之勝單騎而殿以刀奮擊金人望見勝知其為將也以五百騎圍之數重勝馳突四擊金陣開復圍戰移時身被數十槍冒刃出圍金兵追之馬中矢踣步而入若無敢當者金人又急攻絕其水砦中食乾糲殺牛馬飲血勝默禱而雨驟作金人攻益急周山為營勝度其必攻海州因出砦趨城中後金人果解蒼山圍自新橋抵城下勝出戰皆捷金分兵四

面攻之勝募士登城以禦矢石
如雨者七日金兵死傷多遁去

發明

金人據有中原陵勢華夏誠臣子之所共憤
仇恥之所必雪者也苟有倡義而起為國恢

復綱目之所予也魏勝乘時崛起號召豪傑委身
百戰遂復海州可謂致命遂志者矣非明於君臣
之大義曷克以臻此哉故綱目特筆起義曰宿
遷人魏勝起兵復海州所以深嘉而亟予之也

廣義

信義者收復人心之本也魏勝以匹夫而行
信義其效如此況有疆場者耶若勝者其過

人遠
矣

以成閔為京湖制置使○金主亮殺其太后圖克坦氏

九月遂大舉入寇

國克坦后聞亮欲南侵以言諫之亮不悅每謁見還宮必忿怒人不知其故至汴后居寧德宮使侍婢高福娘問亮之起居帝幸之因使伺后動靜凡后所為事無大小福娘夫特默格教福娘增飾其言以問及契丹反樞密使布薩呼圖往討辭謁后后謂曰國家世居上京既從中都今又至汴復將興兵涉江淮伐宗疲弊中國我嘗諫止之不見聽也契丹事復如此奈何福娘以告亮亮意謂后嘗養鄭王充為己子充四子皆成立恐呼圖將兵在外或有異圖乃召點檢大懷忠等使弑后且指名后左右數人皆令殺之后方携蒲懷忠等至今后跪受詔后愕然方下跪尚未局使革特默從後擊之仆而復起者再高福娘等繼殺之并殺其左右數人亮命焚后於宮中棄骨於水并殺鄭王充之子塔納阿里布等三人遂召呼圖等還皆殺之封高娘為勛國夫人以特默格為澤州刺史又以尚書令張浩左丞相蕭玉諫伐宋痛杖而釋

之自是莫有敢諫者遂分諸道兵為三十二軍置左
右大都督及三道都統制府以提之以賓都為左大
都督李通副之赫舍哩良所為右大都督烏雅富勒
琿副之蘓保銜為浙東道水軍都統制完顏正嘉副
之由海道經趨臨安劉萼為漢南道行營兵馬都統
制自蔡州職別果圖克坦喀齊喀為西蜀道行營兵
馬都統制由鳳翔取大散關駐軍以俟後命左監軍
圖克坦貞將兵二萬入淮陰九月亮召諸將授方畧
賜宴於尚書省命皇后圖克坦氏太子光英居守張
浩蕭玉敬嗣暉留治省事亮戎服乘馬具裝啟行妃
嬪皆從衆六十萬號百萬種帳相望鉦鼓之聲不絕
李通造浮梁於淮水之上將自清河口入淮東大震

發明

裁者下裁上之名所以著亮之罪也逆亮欲
為君則弑其君欲伐國則弑其母此誠人情
之大變天理所不容其惡可勝言哉前史皆以殺
太后為文分注因之亦云鑑殺至綱目始正名定

罪變文書裁所以扶天理遏人欲正名分植綱常
逆亮之罪益暴白而不可掩矣大舉者惡恃衆也
入寇者外而罪之也上書裁太后下書遂入寇則
是因太后之阻殺之而始遂其志耳其義豈不明
且切哉

廣義

嗚呼自開闢以來未有亮之窮光極惡滅絕
天理者也且虎狼尚有父子蜂蟻猶有君臣

睚鵙有夫婦之別鵠鴒有兄弟之情凡得天地以
生而有知覺運動者莫不各有一偏之情而況人
為萬物之靈者耶今馬跡亮之所為則是盈天地
間醜惡之物不足以充其類也高宗不以此之察
而反以信義
責之哉

以黃祖舜同知樞密院事○金人犯黃牛堡吳璘等敗

之遂復秦隴洮三州

金圖克坦喀齊喀將兵扼大散關遊騎攻黃牛堡守將李彥堅告急人情洶洶制置使王綱中跨一馬馳二百里至吳璘營起璘於帳中責之曰大將與國義同休戚臨敵安得高枕而卧璘大驚即馳至殺金平駐軍青野原益調內郡兵分道而進授以方畧以援黃牛剛中又以蠟書抵張正彥濟師西師大集李彥堅以神臂弓射金師卻之璘遣別將彭青至寶雞渭河夜劫橋頭寨破之又遣劉海復秦州彭青復隴州曹休復洮州金師既退剛中倍道馳還謂其屬李燾曰將帥之功吾何有焉燾嘆曰身督戰而功成不居過人遠矣

劉錡遣兵復泗州○高平人王友直起兵復大名遣使

入朝

友直幼從父佐游志復中原聞金主亮渝盟乃結豪傑謂之曰權所以濟事權歸於正何害於理即矯制自稱河北等路安撫制置使以其徒王任為副使偏諭州縣勤王未幾得衆數萬制為十三軍置統制等官以統之進攻大名一鼓而克撫定衆庶諭以紹興年號遣人入朝奏事未幾自壽春來歸詔以為忠義都統制

發明

凡書起兵予倡義也友直交結豪傑志復中原是能以忠義自守者也既而甫復大名遣

使入覲則其心宋亦可見矣故特書

予之所以為臣子徇國之一勸耳

廣義

友直之變通武穆之所不逮焉

冬十月金人圍海州魏勝李寶合擊大敗之

金主亮渡淮慮勝睨其後分軍數萬圍海州會李寶帥舟師由海道將拒敵於膠西勝遣人邀之寶適風至東海慷慨厲士赴援與勝同擊金兵於新橋敗之勝還守北關金兵逼關勝登關門張樂飲酒犒軍士令固守勿出戰踰時乃少遣士出憑險隘擊之金人知不可攻率軍轉而渡河襲關後勝歛兵入城金人欲過砂堰圍城為營勝先已據堰拒之尋以單騎逐敵於東門外大聲叱之金騎五百皆望風退勝又追十數里金兵駭散翌早乘昏霧四面薄城勝乃竭力捍禦城上鎔金液投火牛金兵不能前多死傷乃拔走

金人渡淮劉錡進軍楚州以拒之

劉錡兵至揚州建大將旗鼓軍容甚肅觀者歎息以兵駐清河口扼金師金人以種襄船載糧而來錡使善沒者鑿沉其舟金人自渦口渡淮錡次於淮陰列兵運河岸以扼之

金人立曹國公烏祿為帝於遼陽更名雍

金主亮自發汴京將士在道多亡歸者哈斯罕明安福壽高忠建盧萬家博索路總管點音東京穆昆金珠等始受甲於大名即舉步亡歸從者至二萬餘皆公言於路曰我輩今往東京立新天子矣時東京留守烏祿許王鄂爾多之子太祖之孫也性仁孝沉靜明達衆心歸之亮嘗使摩囉歡圖淮北諸王烏祿聞而憂懼會故吏祿錦自汴還具言金主弑母等事且曰將遣使害宗室兄弟矣烏祿益懼謀於其舅興元少尹李石石勸烏祿先殺副留守高存福烏祿遂執存福將殺之適福壽等以軍入東京乃共殺存福等

烏祿遂御宣政殿即位大赦改元大定下詔暴揚亮罪惡數十事追尊鄂爾多為帝廟曰睿宗

發明

綱目凡僭國之君自立者則書其稱帝為人

所立者則曰以某稱帝今烏祿亦為衆所立何不曰金人以曹國公烏祿稱帝而書金人立曹國公烏祿為帝所以明金人心服而立之也逆亮滅絕倫理帥兵南下寡助之至親戚畔之乃獨夫耳金之國豈亮所可有乎予在烏祿則罪逆亮矣權其輕重而書之若此此所以為綱目微君子莫能修之

廣義

書曰金人立烏祿曹國公為帝者於以見通國之人立雍而逐亮也亮雖欲歸國得乎

劉錡將王權軍潰於昭關錡引還揚州金主亮入廬州

錡遣都統王權措置淮西權不從錡節制聞金兵大至即棄廬州退屯昭關不戰而潰錡聞之遂自淮陰

還揚州金主亮入廬州
權自昭關退保和州

吳拱成閔遣兵復鄧唐諸州○帝親征詔葉義問督視
江淮軍馬虞允文參謀軍事

帝聞王權敗召楊存中至內殿議禦敵之策因命存
中就陳康伯議欲航海避敵康伯延之入解衣置酒
帝聞之已自寬明日康伯入奏曰聞有勸陛下幸越
趨閩者審爾大事去矣盍靜以待之一日帝忽降手
詔曰如敵未退散百官康伯焚詔而後奏曰百官散
主勢孤矣帝意既堅康伯乃請下詔親征帝從之以
葉義問督視江淮軍馬中書舍人虞允文
贊參軍事尋以楊存中為御營宿衛使

發明

征者上伐下之詞耳中國也自和議既成偷
安江左餘二十年矣忘讐事金委為固然茲

因逆亮構隙陵轅中原帝能渙起宸斷率將親征
可謂稍振委靡之氣矣蓋由陳康伯之為相也在
紹興初則有趙鼎在紹興末則有康伯皆能以義
正君而有回天之力焉耳據事直書其義自見
廣義

康伯此舉即寇準澶淵之役也其獨斷之堅者豈非以金人衆叛親離也哉

金人陷真州統制邵宏淵逆戰敗走○詔吳璘出兵漢
中璘遂復商虢州○王權退屯采石金主亮入和州

亮入和州以梁山濞水洄先所造戰船不得進命李
通復造船督責苛急將士日夜不得休息壞城中民
居以為材木煮死
人骨為油用之

發明

王權不忠之罪至是益著矣前遣劉錡節制
軍潰昭關而廬州既陷此乃退屯采石畧無

敵擊而和州復失有臣如此安能免其誅戮乎故下書編管瓊州所以予其罰有罪也

李寶大破金人於陳家島殺其將完顏正嘉

寶既解海州之圍遂與其子公佐引舟師至膠西石
臼島敵舟已出海口泊陳家島相拒僅一山時北風
厲寶檣於石臼神風自拖樓中來如鍾鐸聲衆咸奮
引舟握以待戰敵操舟者皆中原遺民遙見寶船始
歛兵入舟中使不知王師猝至風駛舟疾過山薄敵
鼓聲震蕩海波騰躍敵大驚掣釘舉帆帆皆油絢彌
亘數里風浪捲聚一隅窘束無復行次寶命火箭射
之火焰隨發燒數百艘火所不及者猶欲前拒之寶
叱壯士躍登其舟以短兵擊殺之降其衆三千餘人
斬其帥完顏正嘉等六人擒仇詢等上於朝獲其統
軍符印與文書器甲糧斛以萬計餘物衆不能舉者悉焚之火四晝夜不滅

金人陷揚州劉錡遣兵拒於阜角林大敗之

錡以舟渡真揚之民於江南留屯瓜洲金人來爭之錡命步將吳超員錡王佐等拒之於阜角林錡陷重圍下馬死戰佐以步卒設伏林中金人既入張弩俄發金人以運河岸狹非騎兵之利稍稍引去追擊大破之斬其統軍高景山

十一月召張浚判建康府

殿中侍御史陳俊卿上疏極言浚忠蓋帝悟乃詔復官判建康浚至岳陽買舟冒風雪而行時金兵充斥浚遇東來者云敵兵方盛焚采石烟焰漲天慎毋輕進浚曰吾赴君父之急知直前求乘輿所在而已遂乘小舟徑進時長江無一舟敢行北岸者

廣義

或曰張魏公冒險以赴君父之急固為當矣倘有不利用則身且不保其如君父之急何曰

魏公惟盡其誠而已至於生死得喪何暇計哉

編管王權於瓊州以李顯忠代將其軍○金人侵瓜州葉義問使中軍統制劉汜禦之敗績義問走建康

時劉錡病甚求解兵柄留其姪中軍統制汜以千五百人塞瓜洲李橫以八千固守詔錡還鎮江專防江於是盡失兩淮之地金人攻瓜洲汜以克敵弓射却之葉義問至鎮江見錡病劇以李橫權錡軍遂督兵渡江象以為不可義問強之汜請出戰錡不從汜拜家廟而行金人以重兵逼瓜洲汜先退李橫以孤軍不能當亦卻失其都統制印橫左軍統制魏俊右軍統制王方死之橫記僅以身免錡聞汜敗因憤悶疾

益甚義問聞之乃遵陸
趨建康市人皆媒罵之

發明

金兵南逼蔓衍江淮正臣子奮激立功之時也瓜洲之戰劉錡未可而劉記竟違之義問

以促之遂使王師敗績迄無成功然則劉記輕佻失律固無足責義問身為都督不能捐生殉國而乃奉頭鼠竄苟有丈夫志者豈不愧死土地哉分注以遵陸趨建康為文綱目璦文直書曰走所以著其效匹夫輕身之事而其罪殆不可掩矣嗚呼宋人積弱之勢於此可見矣

虞允文大敗金軍於采石金主亮趨揚州

亮築臺江上自披金甲登臺殺黑馬以祭天以一軍一矢投於江中召賓都等謂之曰舟楫已具可以濟江矣富勒琿曰臣觀宋舟甚大我舟小而行遲恐不可濟亮怒曰爾昔從梁王追趙構入海島豈皆大舟

邪誓明日渡江晨炊玉麟堂先濟者與黃金一兩亮置黃旗紅旗於岸上以號令進止時葉義問命虞允文往蕪湖迎李顯忠交王權軍且犒師允文至采石權已去顯忠未來敵騎充斥官軍三五星散解鞍束甲坐道傍皆權敗兵也允文謂坐待顯忠則誤國事遂立召諸將勉以忠義曰金帛告命皆在此以待有功衆曰今既有主請死戰或謂允文曰公受命犒師不受命督戰他人壞之公受其咎耶允文叱之曰危及社稷吾將安避乃命諸將列大陣不動分戈船為五其二並東西岸其一駐中流藏精兵待戰其二藏小港備不測部分甫畢敵已大呼亮操小紅旗麾數百艘絕江而來瞬息之間抵南岸者七十艘直薄官軍軍小卻允文入陣中撫統制時俊之背曰汝膽畧聞四方立陣後則兒女子爾俊即揮雙刀出士殊死戰中流官軍以海鱗船衝敵舟皆平沈敵半死半戰日暮未退會有潰卒自光州至允文授以旗鼓從山

後轉出敵疑援兵至始遁允文又命勁弩尾擊追射
大敗之金兵還和州凡不死於江者亮悉敲殺之會
報曹國公已即位於東京改元大定亮相驛嘆曰朕
本欲平江南改元大定此非天乎因出其素所書取
一戎衣天下大定改元事以示羣臣遂召諸將帥謀
北還且分兵渡江李通諫曰陛下親征深入異境無
功而還若衆散於前敵乘於後非萬全計若留兵渡
江車駕北還諸將亦將解體燕北諸軍近遼陽者恐
有異志宜先發其渡江斂舟焚之絕其歸望然後陞
下北還南北皆指日而定矣亮然之允文知亮敗明
當復來夜半部分諸將分海舟縋上流別遣盛新以
舟師截金人於揚林河口明旦敵果至因夾擊之復
大敗焚其舟三百敵遣偽詔來諭王權似有宿約者
允文曰此反間也乃復書言權因退師已寘憲典新
將李顯忠也願快戰以決雌雄亮得書大怒遂焚其
龍鳳舟斬梁漢臣及造舟者二人率其軍趨揚州使

符寶郎耶律摩多護神果軍拒淮渡凡自
軍中還至淮上無都督府文字皆殺之

發明

采石之戰不過敗卒數百而破敵十萬之衆
以勢以力皆不可敵也允文書生獨能勝之

得非其運籌決策有以大過人乎雖然當敵騎充
斥我軍單弱允文勉以忠義士氣百倍卒收成功
金人大衄可見天理之在人心有不可得而泯沒
者允文之勝乃忠義固結人心云爾否則雖堅甲
利兵奚足恃哉孟子曰多助之至天下順之此之謂也故特書以深予之

廣義

或曰虞允文之敗金人也何其成功之若是
速哉曰允文之識時達權岳武穆之所不及

也况亮已知雍為國人所立自知舉國之人皆不
願戴己也然其兵已出矣何可已乎譬猶人之外雖
無病其臟腑已先受疾矣是以貌雖欲勝而心實
孤焉况亮以貪暴殘虐御下允文以公忠信義

人又加以決策臨陣之機此所以成功之速也曰
然則其與謝玄之淝水周瑜之赤壁劉錡之順昌
孰優曰允文優何優乎曰謝玄周瑜劉錡宿將也
允文書生也彼皆出師禦敵此則將命犒師特以
見當時事危勢迫故不顧矯制之小嫌以成退敵
之大功也噫以宿將之才而勝敵於豫備者易以
書生之見而勝敵于倉卒
者難此允文之所以優也

劉錡罷以成閔李顯忠吳拱為兩淮京湖三路招討使

顯忠至采石虞允文語之曰敵入揚州必與瓜洲兵
合京口無備我當往公能分兵相助乎顯忠分萬六
千與之允文遂還京口時敵屯重兵滁河造三牐儲
水深數尺塞瓜洲口楊存中成閔邵宏淵諸軍皆集
京口凡二十餘萬允文以戰艦數少不足用聚材改
治之命張深守涂河口扼大江之衝以苗定駐下蜀

為援且謁劉錡問疾錡執允文手曰疾何必問朝廷養兵三十年一技不施而大功乃出一儒生我輩愧死矣以疾篤召還提舉萬壽觀詔以閔等為招討使閔淮東顯忠淮西拱湖北京西

廣義

劉錡為將無瑕可指世稱張韓劉岳之劉謂尤世也若以尤世之劉為劉錡之劉則庶乎

得其當矣

金主亮為其下所殺

亮至瓜洲居於龜山寺虞允文楊存中同臨江按試命戰士踏車船中流上下三周金山回轉如飛敵持滿以待相顧駭愕亮笑曰紙船耳有將士跪奏南軍有備不可輕顧駐揚州徐圖進取亮怒杖之五十召諸將約以三日濟江否則盡殺之驍騎高僧欲誘其黨以亡事覺亮命衆刃剄之乃下令軍士亡者殺其

富勒琿富埒琿亡者殺其穆昆穆昆亡者殺其明安
明安亡者殺其總管由是軍士益危懼亮又令軍中
運鴉鵲船於瓜洲期以明日渡江敢後者死衆欲亡
歸乃決計於浙西都統制耶律元宜及猛安唐古烏
野且曰前阻淮渡皆成擒矣比聞遼陽新天子即位
不若共行大事然後舉軍北還元宜然之乃期詰旦
衛軍番代即行事黎明元宜等帥諸將以衆薄亮營
亮聞亂意宋兵奄至攬衣遽起箭入帳中亮取視之
愕然曰乃我兵也近侍大慶山曰事急矣當出避之
亮曰走將安往方取弓已中箭仆地延安少尹納哈
塔鄂勒博必之手足猶動遂縊殺之軍士攘取行營
服用皆盡乃取驍騎指揮使大磐衣巾裹其尸而焚
之收其妃嬪及李通郭安國圖克坦永年梁琬大慶
山皆殺之元宜自為左領軍副大都督使人殺太子
光英於汴退軍三十里遣人持檄詣鎮江軍議和未
幾金兵在荆襄兩淮者皆援柵北還史臣曰完顏亮

智足以拒諫言足以飾非欲為君則弑其君欲圖隣則弑其母欲奪人之妻則使之殺其夫三綱絕矣何暇他論至於屠滅宗族翦刈忠良婦姑姊妹盡入嬪御卒之戾氣感召身由惡終使天下無道主以亮為首可不戒哉可不戒哉

發明

逆亮以臣反君故有臣禍之報天道昭昭固已甚明綱目書此書殺而不書其弑者逆亮

既不君其君亦安能復臣其臣哉然而不書誅者則以臣下殺之故耳獨夫殘虐內外離心曾不再傳其下圖之直書曰殺亂臣賊子蓋亦以是少警哉

廣義

嗚呼亮以慘酷不仁施之天以慘酷不仁報之天綱之密毫釐不爽可畏也哉曰然則何

以不書曰弑而書曰殺蓋書殺者所以著亮之惡以見國人殺之不以人主待之也

十二月成閔李顯忠收復兩淮州郡○帝如建康

張浚至建康即具行宮儀物請車駕臨幸帝從之帝至建康張浚迎拜道左衛士見浚無不以手加額浚起復用風采隱然軍民皆倚為重

金主雍入燕

壬午三十二年

金大定二年

春正月朔日食○山東人耿京起

兵復東平遣其將辛棄疾來朝

金主亮死中原豪傑並起山東忠義耿京據東平自稱天平節度使以齊州歷城人辛棄疾掌書記棄疾勸京來歸京遣棄疾奉表詣行在帝大喜厚資之以京知東平府

金主雍遣使來聘

金主雍下令散南征之衆以高忠建為報諭宋國使且告即位

發明

凡書來聘者嘉其慕義自通故進之也金自紹興十三年書來聘至是餘二十年而再書

蓋亦鮮耳金主雍散南征之兵遣報諭之使是蓋慕義自通者故書予之君子不盡絕人之意可見矣

二月以虞允文為川陝宣諭使

允文還朝帝慰藉嘉嘆謂陳俊卿曰允文朕之裴度及是陞辭言金亮既誅新主初立彼國方亂天相我恢復也和則海內氣沮戰則海內氣伸帝以為然允文至蜀遂與吳玠經畧中原

帝還臨安

時將祔欽宗於太廟帝還臨安謂張浚曰卿在此朕無北顧憂矣御史吳芾言建康可以控帶襄漢經畧淮甸大駕宜留以繫中原之望若還臨安則西北之勢不能相接不從

發明

敵至則如建康退則還臨安是知高宗如惟以東南為安便其無意於中原之心久矣雖吳芾之反覆切諫帝不俞允惜哉書還臨安乃所以識之也

廣義

高宗不欲都建康者畏金兵之迫已也決意還臨安者欲偷生於一隅也其無志可知矣

金以張浩為尚書令

金主雍嘗謂宰相曰進賢退不肖宰相之職也有才能高于己者或懼其分權往往不肯引置同列朕甚

欽定四庫全書

御批歷代通鑑輯覽

卷十五

五十五

不取卿等母以此為心時有近侍進言欲罷科舉者
金主問浩曰自古帝王有不用文學者乎浩曰有之
曰誰與浩曰秦始皇金主顧近侍
曰豈可使我為秦始皇事遂寢

廣義

分注載金主雍與羣臣聞答之辭炳
炳可觀其不負國人共戴之心矣

閏月祔欽宗主於太廟○吳璘復大散關分兵守和尚

原金人走寶雞

璘遣兵復河源州及積
石鎮軍遂復大散關

楊椿罷○太尉威武節度使劉錡卒

錡以劉汜敗發怒嘔血數升至是卒贈開府儀同三
司諡武穆錡慷慨深毅有儒將風金主亮之南下也

今有敢言劉姓名者斬枚舉南朝諸將問其下孰敢當者皆隨名姓以對其答如響至錡莫有應者亮曰吾自當之惜錡以疾不能成功齎恨而沒

發明

錡慷慨深毅有儒將風忠義之心老而彌篤而與韓岳齊名是誠宋之良將也茲因劉泥之貶發憤嘔血而死然則非憂國之至者能如是乎惜其為秦檜所忌廢處散地二十餘年時方倚以為重而錡乃告終矣詎不深可嘆哉卒而具官蓋予之也

耿京將張安國殺京以降金辛棄疾還執安國送臨安斬之

張安國殺京降金辛棄疾還至海州與衆謀曰我綠主帥來歸朝不期事變何以復命乃約李寶統制王

世隆等徑趨金營即帳中縛安國獻於臨安斬之詔
授棄疾江淮判官棄疾獻議恢復持論勁直不為迎
合衆
壯之

發明

耿京山東之豪傑仗義崛起遂復東平綱目
前書曰起兵復東平皆所以予之也安國陰

蓄異志殺京降金則其叛逆之罪固無足論者棄
疾痛主將之無辜憤逆賊之背國謀於諸將執送
臨安其討賊之義正矣苟非明於大義奚能爾哉
綱目特揭而書之於冊者皆所以深予之焉耳

廣義

君子觀棄疾之事不可謂宋無人矣特患高
宗不能駕馭之耳使其得周宣王漢光武其

功業奚
止是哉

吳璘復德順軍及環州

璘遣姚仲取鞏王彥屯商號陝華惠逢取熙河或久
攻不下或既得復失竟無成功仲舍鞏攻德順踰四
旬不克璘以李師顏代之遣子挺節制軍馬挺與敵
戰於瓦亭大敗之擒其千戶耶律糾堅等百三十七
人金人懲其敗悉兵趨德順璘自將往督師先壁於
險且治夾河戰地璘至城下守陴者聞呼相公來觀
望咨嗟矢不忍發璘按行諸屯斬不用命者先以數
百騎嘗敵敵一鳴鼓銳士空壁躍出突璘軍璘軍得
先治地無不一當百至暮璘忽傳呼某將戰不力人
益奮搏敵大敗遁入壁黎明師再出敵堅壁不動會
大風雪金人拔營去凡八日而克璘入城市不改肆
父老擁馬迎之璘又遣嚴忠取環州遂還河池時姚
仲等又復蘭會熙
鞏等州及永安軍

遣起居舍人洪邁使金

欽定四庫全書

卷十五

金高忠建至臨安議遣使報聘且賀即位工部侍郎張聞請嚴遣使之命正敵國之禮彼或不從則有戰耳如是則中國之威可以復振帝然之遂遣洪邁充賀登極使帝謂執政曰向日講和未為梓宮太后雖屈己卑辭有所不憚今兩國之盟已絕宜正名畫境朝儀歲幣當先定之邁乃奏接伴禮儀十有四事既而忠建責事以臣禮以取新復州郡陳康伯以義折之乃止邁行書用敵國禮帝手札賜邁曰祖宗陵寢隔濶三十年不得以時灑掃祭祀心實痛之若彼能以河南地見歸必欲居尊如故正復屈己亦何所惜邁奏言山東之兵未解則兩國之好不成至燕金閤門見圖書不成式抑令於表中改陪臣二字朝見之儀必欲用舊禮邁執不可金鎖使者三日水漿不通及見金人語不遜欲留邁張浩不可乃遣還邁浩季

子也

發明

邁乃皓之季子慷慨忠烈有諸父風出使女
真正議無屈則其不愧是職亦多矣故特具

官以嘉
不辱也

廣義

高宗既然張聞敵國之禮尚何朝儀歲幣之
當先定哉其懦怯之心猶滯於胸中也至若

邁能盡使節其
無愧於乃父焉

夏四月以汪澈參知政事○金人復攻海州鎮江都統
張子蓋及魏勝大敗之

金人復遣烏錦太師發諸路兵二十餘萬攻海州先
遣一軍自州西南斷勝軍餉道勝擇勇悍士三千餘
騎拒於石門堰金軍不能進逮夜始還留千人備險
金兵十萬來奪勝遂率衆鏖戰殺數千人餘皆遁去

勝還入城無何金兵環城圍數重勝與郭蔚分兵備禦或獨出擾之使不得休息又間夜發兵劫其營或焚其攻具既而金人併力急攻勝告急於李寶寶以聞命長子蓋往援進次石湫堰金人陳萬騎於河東子蓋率精銳數千騎擊之統制張汜畧陣中流矢死子蓋曰事急矣奮臂大呼馳入陣勝等繼之殊死戰賊大敗擁溺石湫河死者牛圍遂解子蓋沒之姓也

金追廢亮為海陵煬王

蕭玉敬嗣暉許霖等輔亮為虐皆放歸田里持然格及其妻高氏伏誅

五月立建王瑋為皇太子更名昚

音慎

初金亮南侵兩淮失守朝臣多勸帝退避建王瑋不勝其憤及帝下詔親征瑋請率師為前驅直講史浩

聞之入言於瑋曰皇子不宜將兵因為草奏請扈跸以供子職帝亦欲瑋徧識諸將遂命從幸金陵及還臨安帝欲遜位陳康伯密贊大議乞先正名俾天下咸知聖意遂草立太子詔以進帝從之瑋既立更名春

廣義

孝宗之在藩邸而其直氣凜然不可犯者其有得於范冲朱震尹焞者多矣嗚呼有天下

者烏可不以端人正士而預養國本哉

罷三招討司

以李顯忠主管侍衛軍馬司成閌主管殿前衛司吳拱主管侍衛步軍司顯忠陰結金都統蕭琦為內應請出師欲自宿毫趨汴由汴京以通關陝關陝既通則廊延一路熟知顯忠威名必皆響應且欲起其舊

欽定四庫全書

卷十五

五十六

部曲數萬以取河東會詔罷兵乃止

六月追封子偁為秀王

詔集議子偁封爵戶部侍郎汪應辰定其稱曰太子本生之親議入內降曰皇太子所生父可封秀王諡安僖母張氏為王夫人

朱倬罷○帝傳位於太子自稱太上皇帝皇后稱太上皇后太子即位大赦

帝降手札皇太子可即帝位朕自稱太上皇帝后稱太上皇后退居德壽宮太子固讓不許遂即位班退上皇即駕之德壽宮帝服袍履步出祥曦門冒雨掖輦以行及宮門弗止上皇麾謝再三且令左右扶掖

以還顧謂羣臣曰付託得人吾無憾矣史臣曰高宗恭儉仁厚以之繼體守文則有餘撥亂反正則不足當其初立因四方勤王之師內相李綱外任宗澤天下之事宜無不可為者顧乃播遷窮僻坐失事機始惑於汪黃終制於秦檜偷安忍恥惡怨忘親以貽來世之譏悲夫

發明

書自稱譏之也太上之號乃嗣君之所尊崇耳其曰自稱則非義焉高宗在位三紀於茲時非不久年非不高國不闕而日蹙事不治而日壞而乃使媿臣奉貢偷安一隅中興能事畢矣至是厭倦萬機傳位太子則父母之讐終身不得一日書此文無貶辭然其貶之意隱然見於書法之間矣

帝朝太上皇於德壽宮

上皇在御自當
乘暇問視豈可

限定朝見之期

孝宗於宋因敦

倫之主乃以月

四朝遵藏稱於

史冊何所見之

挾也

帝五日一朝太上皇
不許自是月四朝

以龍大淵為樞密副都承旨曾覲幹辦皇城司

二人帝潛邸內知客也尋以大
淵知閤門事覲同知閤門事

詔中外臣庶陳時政闕失

監南嶽廟朱熹封事首帝王之學必先言格物致知
以極大事物之變使義理所存纖悉必照則自然意
誠心正而可以應天下之務次言脩攘之計不時定
者議和之說疑之也今金於我有不共戴天之讐則
不可和也明矣願斷以義理之公參以利害之實閉
關絕約任賢使能立紀綱厲風俗使吾修政禦敵之
外孑然無一毫可恃為遷延中已之資而不敢懷頃
刻自安之意更相激厲以圖事功數年之外國富兵

疆視吾力之疆弱觀彼蒙之淺深徐起而圖之中原
故地不為吾有而將焉往次言四海利病係斯民之
休戚斯民之休戚係令守之賢否監司者守今之綱
朝廷者監司之本欲斯民之得所本原之地亦在朝
廷而已

發明

人君之德雖不一而求言聽諫乃其大者自
賡言路其亦知所先務焉蓋之六五曰幹父之

蠱用譽象曰幹父之蠱承以德也當時政事闕失
者固多今既詔陳之則因革脩廢之道豈不從可
見哉若孝宗者可謂能知求治之方耳直書於冊
深予之也

秋七月召張浚入朝以為江淮宣撫使封魏國公

帝手書召浚入見浚至帝改容曰久聞公名今朝廷
所恃惟公因賜之坐浚從容言人主之學以心為本
一心合天何事不濟所謂天者天下之公理而已必
兢業自持使清明在躬則賞罰舉錯無有不當人心
自歸敵讐自服帝竦然曰當不忘公言加浚少傅魏
國公宣撫江淮浚見帝英武力陳和議之非勸帝堅
意以圖恢復欲遣舟師自海道檣山東命諸將出師
犄角以向中原翰林學士史浩以潛邸舊臣時預樞
密議欲城采石瓜洲浚言不守兩淮而守江於是示
敵以削弱急戰守之氣不若先城泗州浩不悅遂與
有隙凡浚所規畫浩
必沮之竟無成功

廣義

魏公之遇孝宗可謂受知於君之深者也其
恢復之功必將收之於桑榆矣然則見沮於

史浩豈人力之所能哉孟子曰行或使之止
或尼之行止非人所能也其魏公之謂乎

追復岳飛官以禮改葬

官其孫
六人

發明

岳飛為將十年有折衝禦侮之功固非他將比也然為賊檜所陷以沒其身至是追復官爵以禮改葬是亦公論之不容泯者書以予之宜矣

八月以史浩參知政事九月罷川陝宣諭使虞允文

浩上言官軍西討東不可過寶雞北不可過德順若兵宿於外去川口遠則敵必襲之朝廷遂欲棄三路允文上言恢復莫先於陝西陝西五路新復州郡又係於德順之存亡一旦棄之則窺蜀之路愈多西和成階利害至重不可不慮於是允文罷知夔州以王之望代之明年允文入對言今日有八可戰且以笏

畫地陳棄地利害帝曰此史
浩誤朕也改允文知太平

發明

詩曰亂之初生僭始既涵亂之又生君子信
讒君子如怒亂庶遄沮君子如祉亂庶遄已

史浩沮恢復之計允文上恢復之圖則二人之忠
邪蓋可見矣夫何偏信史浩卒罷允文則是帝信
讒邪而棄正論其禍亂何由而止乎孝宗嗣位之
初先斥正人而悅佞士又何以望其中興也哉即
綱目所書觀之則
其曲直權衡審矣

故遼人伊呀斡罕稱帝金將布薩忠義討平之

斡罕稱帝改元天正兵勢大張往討者多為所敗金
主遣右副元帥默音討之遇於長濼斡罕大敗率眾
西走默音復追敗於霧霖河斡罕去攻懿州金師久
無功布薩忠義自請行乃以為右副元帥代默音忠

義及赫舍哩志寧追之至梟嶺西陷梟大敗之幹罕以數鎬僅免收合散卒萬餘入奚部其黨多降幹罕自知勢窮北走沙陀其徒執之獻于右都監完顏思敬送中都斬之其黨悉平惟札巴不服頗為邊患金人告之

冬十月葉義問罷以張燾同知樞密院事○十一月金以布薩忠義為都元帥赫舍哩志寧副之

金主以宋不稱臣乃詔忠義總戎事居南京節制諸軍復令志寧駐軍淮陽忠義將行金主諭之曰宋若歸侵疆貢禮如故則可罷兵忠義至計簡閱士卒分屯要害

十二月詔宰相復兼樞密使○詔吳璘班師

金以重兵扼鳳翔爭復吳璘新復十三州三軍璘馳德順以備之已而金蒲察世傑率師十萬來攻璘力戰拒之時議棄三路

遂詔璘班師


發明

書詔班師譏之也是時新復三路則中興之機在此一舉矣夫何議棄三路而自沮戰功

乎吁

惜哉

御批續資治通鑑綱目卷十五



總校官候補中允 臣王燕緒

校對官中書 臣柴模

謄錄監生 臣夏謙